



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

Trump-Russia tesendaktep ken o nung Sessions-i kuli agütsütsü

TAPAK 12

Jelena-i French open kokogo; Nadal final tongtetogo

VOL. XIV NO. 234 (ADOK 234)

DIMAPUR

MONDAY

JUNE 12, 2017

5.00

Angh Acharya-i 'World Day Against Child Labour' osang metetdaksür

Dimapur, June 11 (TYO): Nagaland aser Arunachal Pradesh Angh, PB Acharya-i nübortem dang ozüing alema tanurtem mapa inyakdaksüba inyakyim anema nokdaksü tayongzükba agütsü.

2002 küm International Labour Organization (ILO)-i World Day Against Child Labour amungtsü tenzük. Alima nung tanurtem mapa inyakdaksüba aziüoktsü aser iba inyakyim anendaksütsü atema mapa inyaksü alizüing yur iba anogo amunger, ta Acharya-i sangdong ka nung ashi.

June 12 nü World Day Against Child Labour amungdang, sorkartem, employers aser workers organizations, civil society aser alima tesem balala nung nisung million aika longjemdaksür. Iba anogo nung asenoki tanurtem khuret atema tebilemsü tali

metetdaksür aser tanurtem mapa inyakdaksüba inyakyim anendaksütsü atema sentongtem atonger, ta Angh-isa metetdaksü.

ILO-i Child Labour teratet agütsüba nung tanurtem sen yong ayokba, sentsüh melena mapa inyakdaksüba, linük nung tanur nem mapa inyakdaksütsü melaba aser arishi küm 18 teküpok alirtem mapa inyakdaksüba onüktem shia lir. Iba nung tanurtem rara nung amshiba, teküp yokdaksüba aser mozü shibelenba ama ozüing alema mapa inyakdaksübatem dena lir.

Tanurtemji tarutsü atema teimla lir. Anungji asenoki asen loktiliba nung children labour melidaksü. Tanur shia nem school-i aotsü aser azüingtsü-zülutsü metettsü atema maongka agütsüsüla, ta Angh Acharya-isa ayongzük.

ENPO & ENNWU külem senden amen

Dimapur, June 11 (TYO): June 10, 2017 nü Bookmarc, Bank Colony Dimapur nung Eastern Naga People's Organization (ENPO) aser Eastern Naga National Workers Union (ENNWU) tsüingda senden ka amen, ta sangdong ka nung metetdaksü.

Senden nung tir Khoiwangi anir ENPO züingsemte, Eastern Naga Women Organization (ENWO), Eastern Naga Students Federation (ENSF) aser tribal President 6 aden aser ENNWU tenüing nung Convener B. Moba Chang Kilonser, Co-Convener, Thsanfu Steering Committee Member, General Secretary, L.P. Kamthong Steering Committee Member, Jt. Secretary, Bitong, Dy. Kilonser aser Collective Leadership züingsemtem-Tongmeth Wangnao o TT.

Among nungertem aden, ta GPRN MIP sangdong ka nung ashi.

Senden nung Eastern Nagaland nung dak sendakba onüktem benoka olemtep aser ENPO tir, Khoiwang Konyak-i o jembidang, Eastern Naga atema state balaka tentetsüba aser telungjem o yimjung alitsü indang onüktem lemsatap.

Pai collective Leadership dang iba takhangbaji Centre dangi abentsü aser Eastern Naga tesemtem nung timtem alibatem metetdaksütsü mepishia metetdaksü, ta MIP sangdong nung shia lir.

Senden nung ENPO resolution 2002 sangdongba nung masetshii nokdaksü aser India sorkar den tang teinyakdak yimjung maparen pusema nugittsü aser tatembang kati maru tashi yariteptsü bangzünga renem, ta MIP sangdong nungsa metetdaksü.

GST: Movie tickets, insulin, school yangkhutem jenjang dalangba akümtsü



Deobarnü New Delhi nung aliba Vigyan Bhawan nung Union minister for Finance & corporate affairs Arun Jaitley aser revenue secretary Hasmukh Adhia na 16 buba GST Council senden nung o jembidang agiba noksa ka angur.

New Delhi, June 11 (Agencies): July 1, 2017 nung India nung Goods and Services Tax (GST) mapa kuma tenzüksü lir, aser Deobarnü GST Council senden 16 buba amendang oset kar nung saru ajemba osang metetdaksüogo.

Tanü senden tembangba sülen Finance Minister Arun Jaitley-i osangbenertem dang ashiba agi, parnoki items 66 indang saru

meyipa reprangshim.

Parnok dang items 133 indang saru reprangshimtsü atema asüingdang aser item rongnungi items 66 indang saru melenshiogo, ta paisa shisem.

Tongtipang melenshibatem:

1) Movie Tickets: Regional film industry nungi tebilembatem lemsatapba nung ajemdaker GST Council-i sen 100 dak tajemba movie tickets jenjang nung 28%

agitsü ta asüba nungi 18% agitsü ajemogo. Ajisüaka, sen 100 tema movie tickets jenjangbo kasa dang asütsü.

2) Insulin: Taoba mapang parnoki insulin nung saru 12% agitsü ta latet saka ibaji 5% ajemtsüogo. Maneni health industry atema teyari agüja, dental wax nung 28% agitsü ta asüba nungi 8% ajemtsüogo.

(Maneni tapak 11 nung...)

Imkong L Imchen-i National Electronic Media aitsür

Dimapur, June 11 (TYO): Nagaland Chief Minister, Dr. Shürhozelie Liezietsu-i NSCN(K) Chairman, S S Khaplang asüba atema asükhu lemsatapba osang sangoktsüba nung Electronic Media-i tim mesüi belenshiba atema sasa bilemer, ta Imkong L Imchen-i tanü metetdaksü.

Nagaland Forest, Environment & Climate Change Minister aser Cabinet Committee on Political Mission züingsem, Imkong-i Chief Minister-i ashiba o ajak pusema nungiter, ta sangdong ka nung ashi.

"Dr. Shürhozelie'er cabinet nung ni Minister ka asüba atema masü saka Naga senso ka ama tebilemsü bena, ni Chief Minister indang o pusemer aser National Electronic Media-i iba sangdong anema nokdabaji ni mangateter,"

ta Imkong-i ashi.

India nung Fourth Estate ji kanga dang tongtipang lir aser linük yangerba nung shilem tulu agir. Anungji, parnoki tetsüba melii aser shinga tsütsü mesüi, osang shitak proktsüla, ta paisa shisem.

"Ajisüaka, National Electronic Media-i Chief Minister Dr. Shürhozelie-i asür SS Khaplang asüba atema asükhu lemsatapba sangdong anema ola adokba angudang, ni mepelar aser item media nisungtem jagi Linük tenzüksü atema masü saka tanga miim tebilemba kar yur mapa inyaker ama nibo bilemer" ta paisa sangdong nung shia lir.

Nagaland state nung Dr. Shürhozelie ya Regional politic tenzükter rongnung ka lir ta ajaki meteta lir. India nung regionalist

politician ji pa dang masü saka state aika nung pa ama regional politician aika lir.

"Dr. Shürhozelie ama lennir ka dak tai tongloktsüba lanurtemji shirnok'ar ni metetnür. Nenoki English mesüra journalistic oshitembo kanga junga meteta alitsü akok saka nenoki politics memetet. Nenoki osang mashileni prokshiba ajanga linük mashileni anisar, anungji nenok dang Fourth Estate community/fraternity züingsemtem ta ajatsü malang" ta Imkong L Imchen-isa metetdaksü.

"Media nisung ajak dak tai tongloktsür masü saka Naga yimten tebilemsü mashileni meypsa prokshiba media nisungtem dang iba olen sangoktsür" ta paisa shisem.

Khango Konyak-i asür SS Khaplang menden melenzüksü

Kohima, June 11 (Agencies): NSCN-K nung Chairman SS Khaplang asüba sülen NSCN-K nung lennir tejen Khango Konyak-i iba menden melenzüksü ta osang ka ajanga ashi.

Ajisüaka, chairman tasen shimba osangji NSCN-K nungibo official sangdong kecha mali.

Hokolbar aonung SS Khaplang arishi küm 77 nung lia Taga, Myanmar nung aliba NSCN-K Council Headquarters nung asü.

Lt. Gen. (Retd) Khango Konyak ya Naga Army nung Lieutenant General inyaka liasü

aser pa May 2011 nung NSCN-K Vice-Chairman inyaksü shima liasü.

Taoba mapang pai East Pakistan (tang Bangladesh) aser China nung guerrilla warfare training agia liasü.

Khango-isa Konyak Region nung Chairman aser Tuensang-Mon Regional Union nunga Tir mapatem inyakogo.

Pa 1963 küm Naga Army nung züingsem aküm aser 1966 nung pa Alee (Foreign) command kübok Pakistan-i yok, ta osang ka ajanga ashi.

1976 nung Khango-i China semdang aser pai Naga Army nung Mobile commander, Battalion, Operations aser Brigade Commander mapatem inyak.

1985 nung pai Council Guard Commander inyak aser 2004 nung General Head Quarters (GHQ) nung GSO-II (General Staff Officer) inyak.

Lt. Gen. (Retd) Khango Konyak ya Central Council Member (CCM) nung züingsem ka asütsü shimok aser iba sülen pa Kilo Kilonser, GPRN inyaksü shima liasü.

TANGATETER

OCHISHIR

JAKLA TAJUNG AKETBA

ASER

NÜBORTEM DANG KANGA MEIMBA

NISUNG NEM

VOTE AGÜJANG



Longleng nung 'Sabka Saath Sabka Vikas Sammelan' sentong kaogo



June 10, 2017 nü Government Higher Secondary School Auditorium, Longleng nung "Sabka Saath Sabka Vikas Sammelan" sentong akadang BJP Longleng District-i sobaliba ken ka agi shilem agiba noksa nung angur.

Longleng, June 10 (TYO): Honibarnü Government Higher Secondary School Auditorium, Longleng nung BSNL, Longleng, Nagaland SSA, NE-II Telecom Circle den BJP Longleng District-i ayongzüka "Sabka Saath Sabka Vikas Sammelan" sentong kaogo.

Iba sentong nung tesüiba küm asem nung Centre sorkari social welfare, shisaliok, rongsenkettsüing aser tanga terenlok mapa balala inyakba indang sayaba den terenlok indang film tatsüka sayua liasü.

Iba sentong nung tongti tejaokerji Longleng Deputy Commissioner, Y Denngan Avennoho Phom liasü, Longleng district BJP Tir, B Ajoy Phom aser Phom Peoples Council Tir, P Chingan Phom na tetushi tejaoker liasü.

DC-i, Ato kilonser, Narendra Modi-i mangdang yua sentong yanglur lenla ajak nung linük terenlok atema inyak, aser tesüiba küm asem nung linük kanga inogo, ta metetdaksü.

Iba sentong nung BJP party nung inyakertem,

shishilembartem, sepaitem aser intelligent ketdangsertem den nübur aika aden.

Sentong nungsa BJP Longleng District-i sobaliba ken ka aten aser Good Shephard High School-i sobaliba yar tsüingsang agi shilem agi.

Sabka Saath Sabka Vikas Sammelan sentong ya, BJP-i aniba Centre sorkar küm asem ajungba tenüing nung nüburtem dang terenlok osang sangdongtsü atema linük tesem balala nung ayongzüka amunger.

Mkg nung Sabka Saath Sabka Vikas Sammelan amungtsü

Dimapur, June 11 (TYO): India sorkar tetuyuba nung ajemdaker June 13, 2017 anüngdang 11:30 ako nung Mokochung town hall nung Indian Oil Corporation Limited-i ayonga 'Sabka Saath Sabka

Vikas Sammelan' sentong akatsü aser iba sentong nung tongti tejaoker, Co-Convenor Finance & BJP Executive member, aser Chairman & Managing Director REM group, Temjen Imna Along Lkr den

tongtibang nisungtem adentsü.

BJP-i aniba Centre sorkar küm asem ajungba tenüing nung terenlok osang sangdongtsü atema linük tesem balala nung Sabka Saath Sabka Vikas Sammelan sentong ya ayongzüka amunger.

NBCC, CNTC, CNC-i SS Khaplang asüba mangyimer

Dimapur, June 11 (TYO): Tanü Nagaland Baptist Church Council (NBCC)-i sangdong ka ajanga NSCN (K) Mendenbuba, SS Khaplang alima nungi pilaba atema mangyimba metetdaksü.

"Naga yimtenren nung tang ama tongtibang mapang ka nung asenoki lenla ajaklen shisatsü aliba lenirtem nüngdaker. NBCC-i joko mapang talangka yimjung maparen nung inyaksema arur, aser iba mapang nung NBCC lenirtemi Mendenbuba (Khaplang)-a aiben ajurua aruogo, aser paji tangatetba aliba lenir ka aser akumli piyong Naga nung yimtenren onük atema pai akokba tashi agi inyakba lenir ka ta jangjaogo. Pa asüba ajanga, asen nükjidong ataloktsü atema inyaker lenir ka makai kümogo," ta NBCC-isa metetdaksü.

"Lenirtema asütsü, anungji Nagaland aser Myanmar nung Naga nung aser tangalen Naga nung NSCN (K) Chairman, SS Khaplang atema mangyimbandang asenoki Tsüngrem nungi tesünep aser anisüngzüik ngudakjang ta sarasademer. Iba den külemi

asenoki tamang kateta aliba aser tang asenok den aliba asen lenirtemi tarutsü putu atema Tsüngremer shisatsü nung inyaktsü atema sarasademtsür," ta NBCC-isa metetdaksü.

Central Nagaland Tribes Council (CNTC)-i sangdong ka ajanga, NSCN (K) Mendenbuba, SS Khaplang, Taka, Myanmar nung par kidang ajungbena asüba atema kanga jashia mangyimer, iba ya takoksa ka lir aser Naga nung atema tesasatsüka lir, ta metetdaksü.

Media Cell CNTC-i sangdong nungsa, "SS Khaplang ya, Naga nung atema akumli piyong nüchiso atema rarar walunir ka liasü, aser paji, pa tasünü tashi chichia linük meimer ka aser taküm bendanga agütsür ka ta teti bilemtetsü," ta metetdaksü.

"Naga nung atema pai tenlabatem aser raraa arubatemji Naga nung nüchiso bushiba putiotsü nung kodanga mamatoktsü. Khaplang asüba ajanga Naga nung lenir tajung ka aser Naga nung atema inyaker

ka makai kümogo. Pai pa tasünü tashi pa tangatetbatem nung matsüngshii nokdak, aser ibaji tarutsü lanuputi mamatoktsü," ta sangdong nungsa shia lir.

"Iba ama mangyimba mapang nung ajak takoksang Tsüngemi mangyimer kibong nem tesünep agüjang aser asür nem anisüngzüik agüjang ta CNTC-i sarasademtsür," ta Media Cell CNTC sangdong ajangasa metetdaksü.

CNC: SS Khaplang ya NSCN tenteter züngsemtem rongnung ka liasü, aser 1988 küm mangatetep adokba tashi NSCN Vice Chairman aser GPRN Vice President inyakogo; Naga nung kibong ka ama tanaben onoki melongjemteti alidang pa asüba atema jashir, ta tanü CNC General Secretary, Rev.Seksim Kasar-i sangdong ka nung metetdaksü.

"Onoki pa asüba atema mangyimba den külemi asür kibong züngsemtem nem tesünep agüjang ta sarasademtsür. Tsüngremi pa aser onok nem tatok agüjangma, aser tatem maka tesünep agüjangma ta sarasademer," ta sangdong nungsa shia lir.

CNC-i Lungrei asüba mangyimer

Dimapur, June 11 (TYO): Tanü nikongdang 2:45 ako meta Lungrei Ramsan, arishi küm 100 nung alima nungi pilaba osang angashia Council of Nagalim Churches (CNC)-i mangyimer, ta CNC General Secretary, Rev. Seksim Kasar-i sangdong ka nung metetdaksü.

Pa ya Steering Executive Committee, NSCN aser taoba mapang Naga Army tongti, General Hansi Ramsan tebu

liasü. Pai jabaso tenet aser jala pezü den semchir aser tanabuba semchir aika toktsür alima nungi pilaogo.

"Iba ama mangyim mapang nung Council of Nagalim Churches-i mangyimer kibong züngsemtem den mangyim lemsateper. Tsüngremi parnok nem anisüngzüik den tesünep agüjang aser asür nem tatem maka anisüngzüik agüjang ta sarasademtsür," ta sangdong nungsa shia lir.

Truck nung khu tali abenba agi lenmang raksar



Dimapur, June 11 (TYO): Truck garitem nung khu tali abenba agi National Highway 29 lenmang raksar, aser talisa Kohima aser Dimapur tsüngda tang teyangludak four lane lenmang nung lendong ataloktsüsa kümdaktsür, aser kuli balala ajanga anogoshia lendong balala ajuruba den külemi ainlen senzürtemi timtem kanga ajurur.

Tim ketdangseri Motor Vehicle Act, 1988 nung aliba ama inyaktsüla, kechiyong gari nung khu abentsü atema lateta aliba dang nungi khu kanga tali abenba atema Section/Rule

Ss.113(3),114,115 r/wS.194(I) of M.V Act kübok tajemba agi senchi 2,000 achitsü shia lir, aser khu tali abenba ton shia senchi 1000 aser off-loading atema agütsütsüla.

Nagaland nung aliba gari lenmangtem nung truck nung khu tali abener, aser khu tali abenba agi gari lenmang raksatsür, iba ya ozüing alema inyakba ka lir aser sensotem nem lendong bener arutsür.

Nagaland nung entry point ajak nung weigh bridges (gari touzüik odangba) amenokba den loading agents ajanga truck nung khu oshiba inyakyim benoktsü nüngdaka kümogo.

28 AR-i sen lakh 1 jenjang yi apu



Dimapur, June 11 (TYO): Osang ka lazükba nung ajemdaker June 11, 2017 nü HQ IGAR (N) kübok 28 Assam Rifles sepaitemi Foot Hill Road Junction, Wokha nung Mobile Vehicle Check Post amenoker mitba mapang nung sen lakh ka jenjang yi puogo, ta AR sangdong ka nung metetdaksü.

AR sepaitemi Maruti Gypsy NL 06 1847 soter mita

reprangdang Indian Made Foreign Liquor- Mc Dowell Rum pongdang 295 aser Foster beer 238 den nisung ana apu. Tenaji arishi küm 35, Tsenbemo Ngullie aser arishi küm 35 Kr. Nren Ngullie na liasü, aser tenaprong Wokha village nung alir. Maneni bushisüngdangtsü atema tena den yiji Bhandari Police Station ket nung agütsüogo, ta sangdong nungsa shia lir.

NE handloom osettem ajanga alima market koktettsü: Jamir



Tachichilen nungi tanabula, Menty Jamir, Arunachal Press club, Itanagar nung osangbenertem den jembidang tangokba noksa nung angur.

Itanagar, June 11 (Agencies): Nagaland nungi designer Menty Jamiri ashiba agi, alima nung market tem koktettsüsa Northeast nung südakba mapa nung tashi lir. Laisa ashiba agi, NEIFW nung densemba ajanga North east India nung fashion industry, südakertem aser aluyimertem dak temolung lema bilemer. Jamir aser northeast nungi tanga designer tem Tanü Itanagar, Arunachal Press Clun nung osangbenertem den

sensaksema liasü. North East India Fashion Week (NEIFW) edition tasembuba Itanagar nung October 27 nungi 29 tashi akatsü. Iba sentong ajanga northeast tesem nung südakertem aser designer tem nem parnoki yanglutetbatem sayatsü asoshi maongka agütsür.

Designer Yana Ngoba Chakpu shiba NEIFW Chief Operating Officer lir lai NEIFW akatsüba anogo sangdongdang ashiba agi, "Ni

northeast designer tem rongnungi northeast tesem ajak nungi südakertem den inyakba designer ka lir. Parnok ajungmesotsü aser parnok den inyaksü asoshi onoki northeast state ajunga nungi südakertem den mapa inyaker. Tang tashi nung northeast tesem ajunga nung südaker 150 kü den külemi inyakdar."

Assam aser Nagaland nungi designer tem den külemi südakertem kar dena iba press meet nung shilem agia liasü.

Manipur CM-i nisung 800 tebilemstsütem angadang

Imphal, June 11 (Agencies): Manipur Chief Minister N Biren Singh-i ita nung anogo 10buba nung tenem nung aliba nisungtem dang parnok tebilemstsütem lemsateptsü asoshi ayongzüka inyaka arudar aser tang tashi nung nüburtemi kanga telangzüba tajung agüja arudar. 'Hill People's Day' tanabuba Chief Minister indang Secretariat complex nung Honibarnü ayongzüka agiba nung, yimdak nung lenirtem aser lokti balala nungi lenirtem, lokti aser yimtsüing 260 tenüing nung parnok 800 shi state nung tenem nung aliba district ajak nungi arua Chief Minister den ajurutepa liasü, ta CM Secretariat ajanga metetdaksü.

CM Biren-i nüburtem den ajurutepa liasü. Item nisungtem arrtsü len aliba kinük tesemtem nungia arua liasü aser CM Secretariat complex nung

anepdang 8:45 nungi nikongtsütsü 2:30 tashi ghonda 5 shi khendanga tanen makai CM-i parnok den ajurutepa sensakasem, ta kasa osang ajanga metetdaksü.

Chief Minister-i ashiba agi, lokti balala aser yimtsüing lenirtemi lenmang majungba, tzü tajemtsü tebilemstsü, asayadak moapu makaba aser community hall maliba amala tebilemstsütem lemsatep. Paisa ashiba agi, Hill People's Day aser Meeyamgi Numit ajanga tebilemstsütem mengujemi aliba aika jangjaogo.

Pai ashiba agi, state nung BJP-i aniba sorkar kümtetba sülen nungi nüburtemi State administration dak joko temolung alemba sayur. Kinük nung aliba tesem; Tousem, Nambashi aser Jessami amala nungia ni ajurui aruogo, ta paisa ashi.

Chief Minister-i maneni

ashiba agi, tawa tzüemtsü nung takoksa ajururtemi parnok tebilemstsütem lemsatepogo. Hill People's Day aser Meeyamgi Numit nung tebilemstsütem dak sendakbatem mapangshi office ajanga reprangshia arudar aser tebilemstsü aser ken o tem shilem 60 bo jenjang tapet agia inyak tenzüokogo.

Alinük dak ajemdaker budget ka benokba Centre sorkari agizükogo, ta CM-i metetdaksü aser tenem lima aliba nüburt tebilemstsütem tawa Hill Area Development Programme sangdongba ajanga anepalutettsü, ta ashi. Iba sentong state nung mezüingbo Chandel, Tamenglong aser Churachandpur district tem nung amenoktsü.

Maneni lenmang yanglutsü asoshi sen crore 600 alanga detailed project report ka Centre nem agütsüba pai metetdaksü.

Khandu, Rijju nati PMUY Arunachal nung amenoktsü

Itanagar, June 11 (Agencies): Tanü State Banquet hall nung sentong ka nung Chief Minister Pema Khandu, Minister of State for Home Affairs Kiren Rijju aser state Food and Civil Supplies Minister Kamlung Mossang nungeri külemi Arunachal Pradesh Pradhan Mantri Ujjwala Yojana (PMUY) amenokogo.

PMUY anemokba anogo nungtem nung nisung 24 nem LPG connection agütsü. PMUY amenoker küm ka tsüingda linük ajunga nung LPG connection crore 2.2 süogo.

Iba sentong tajung amenokba atema Ato Kilonser Narendra Modi tenüing asangba den külemi Khandu-i ashiba agi, iba sentong ajanga Arunachal kanga ajangzüksü kechiyong state nung nütsüing yongsük tesadangkaka, talisa yimtsüing nung alirtem tang tashi sorochioktsü atema süng amshi aser iba ajanga aremtem raksatsür.

June 2 nü Khandu aser Rijju nati New Delhi nung Union MoS, Petroleum and Natural Gas, Dharmendra Pradhan den ajurutepta mapang minister-i 2019 tashi nungbo Arunachal nung kibong shia nung LPG connect sütsütsü ta nangzük. Pai tena dang state nung iba schem tekaraba nung amenoktsü asoshi ajungshi.

PMUY kübok tetsürtem Below Poverty Line (BPL) kibong nung alirtem nem sorochioktsü asoshi totzü temerek agütsütsü. Iba schem ajanga linük ajunga nung BPL nung alir kibong crore 5 nem

LPG connection agütsütsü asoshi nükjidong lir aser maneni connection ka atema sen 1600 agütsütsü.

Iba dak sendaka Khandu-i state sorkaria scheme nung sen agütsüba den bendenloka sen 1000 agütsütsü ta sangdong. Iba ajanga state nung nüburt nem connection ka atema sen 2600 teyari agütsütsü aser iba nung security deposit, pressure regulator, safety hose, consumer card aser installation charges densema lir.

Chief Minister-i maneni Union Ministry of Petroleum and Natural Gas kübok Oil Industry nung züingsemtemi linük nung iba mapa tajung inyakba atema parnok tenüing asang.

North East tesem nungi tepokpok cancer timba adokba dak sendakba nung Rijju-i, iba ya kibong ajak amai nung sorochiokdang süng amshiba ajanga lir ta metetdaksü. Pai ashiba agi, PMUY ajanga iba ya melenshütsütsü aser iba ajanga maneni tzü mepong mereka kümdaktsüba dang masü saka arema wazüka yutettsü.

Oil industry records ajanga sayuba agi, 2017 May ita 1 nü tashi nung Arunachal nung kibong 3.14 nung LPG amshir koba shilem 64 lir. Tarutsü nung LPG amshir noklang nung noklang shilem tongtettsü asoshi Oil Marketing Company temi 'Mela' aser 'Camp' tem tesem balala nung ayongzüka BPL nung aliba kibongtem nem LPG agütsütsü. Iba dak alaka LPG distributor tasen 7 amenoktsü asoshi sentong lir.

Tripura nung CPI(M) lenir ana BJP den aden

Agartala, June 11 (Agencies): Taoba Tripura Assembly Speaker Jitendra Sarkar aser Tripura tribal autonomous district council nung züingsem Joy Kishore Jamatia na Deobarnü tanga lenirtem den külemi BJP nung denogo.

Sarkar shiba taoba election nung Congress nominee ka ama assembly nung shimoka liasü, pa yaküm party aser assembly nungi resign asü.

Jitendra Sarkar ya Schedule Caste lenir ka lir aser pai Assembly election 6ben tashi kokogo. Pa mezüing 2008 küm mangatettep adokba ajanga CPI(M) toktsü aser 2010 küm Congress den aden.

BJP General Secretary Ramlal Ji-i party indang flag party nung tasen züingsemertem nem agüja liasü. Pai ashiba agi CPI(M) aser tanga party tem tashi

meite odar aser iba ajanga BJP tashi taitba kümdar. Paisa ashiba agi, parnoki 2018 assembly election akoktsü.

MDC Joy Kishore Jamatia shiba taoba mapang CPI(M) nungi aritoka liasü pai ashiba agi, "CPI(M) puri parnok züingsem karidanga parnok ola adokra parnok tezülen toktsütsü meranger."

Jamatia-i tribal autonomous district council atema Centre nungi fund arubatem Chief Minister Manik Sarkar-i nokdangba atema pa aitsü. "CPI(M) lenirtemi ni BJP nung adentsü ta osang angazükba sülen nungi parnok den dendaktsütsü asoshi merangya liasü," ta paisa ashi.

Maneni doctor aser lawyer kar BJP nung denogo. Parnok rongnung Advocate Siraj Ali densema lir. Pa tebu ya Agartala Municipal Corporation nung CPI(M) councilor liasü



Guwahati, June 11 : Deobarnü Guwahati nung Sunsilk Mega Miss North East audition nung shilem agirtem tangokba noksa nung angur.



TIR YIMYIM

YIMOBILEM (EDITORIAL)

DIMAPUR MONDAY, JUNE 12, 2017

Nagaland asoshi alima tatem !

India lima tatem külen Kerala state nung oagi Nagaland Police truck gari ka anena lir aser iba gari nungji Nagaland nung alir tsümar takar kati sen aser hon ama belena bener oa ayur ta Kochi nung Income Tax department (Intelligence & Criminal Investigation) teloki puteta metetdaksübaji Naga nung asoshi taoksatsü, takoksatsü aser taaksü osang ka lir. Alima nung police department tenteta police ayuba ya ozüng raksar, ochimashir aser ashir-auer mittsü aser aputsü asoshi ayur. Iba tsümarsang ya nisung ka tenüng agi MKR Pillai lir aser pa ya Nagaland nung mapang kabo Additional SP liasü aser tanga Police department nung pa ya Consultant (MT) lir ta angazüker. Iba jagi pa ya Nagaland police department nung kangasa tongtibang nisung ka kümdakja amshir amato angateter. Ashiko, Naga nung yimsüsür aser tulerter aika chisubo par kidang yua alitsüa akok. Iba ama nisung ka ket nung sen crore meyerijang junga indang rongsen akabaji tesümgangtsüka lir. Temoatsüsa rongnunga Nagaland nung ali langa moatsüogo ta bilemer. Parnok ket nung rongsen aliba ya Income Tax purtemi temulung malem bushitsü tenzükbaji India nung sen meyerijang aser noklang pongo note melenba mapang parnok ket nung rongsen akaba sen crore 50 jenjang metetdaksüba nungi tenzüka liasü. Atangji, sen crore 50 jenjang rongsenjia pai aaba nungi aruba rongsenbo memesük aser meputep liasü. Ibayongji, IT purtemi bushisüngdangtsü tenzüker aser idangjibo sen crore 50 jiang masü saka sen crore meyerijang jenjang rongsen nguteta lir. Atangji, item rongsentemji Nagaland nung ochimashiba mapatem nungi bendenba asütsü ta temulung melemer bilemer, ajisüaka ibaji shitak asü tair ibajibo IT purtemi bushisüngdangyonga aodang metettsü. Ajisüaka, Naga nungertem atema telangzüba nungdakbaji kechi atema Nagaland police truck gari ka Kerala nung oagi amshir ta asüba tasüngdangba ya asütsü. Ozüng raksaba, ashi ayuba aser ochimashiba mapa inyakertem mittsü aser aputsü asoshi public sen agi police department lapoka lir. Ajisüaka, police-temiang police gari nung ozüngi memelaba oset benra aser policetemiang ochimashi mapa inyakra Nagaland asoshibo ibaji alima tatembang asütsü. Idangjibo, nübertem dang tauyatetter tashibo auyaang, rakzükratem asüyonga kecha masü aser ozüng kübok alibajiang pei asoshi takoksa asütsü ta ayimoktsütsülang asütsü. Tangar lima nungbo police-tem ya ozüng raksartem mitertem dang masü saka police-tem ajanga pei lima topur jungdaksür. Aji oda, police uniform tajung shitak semer senzüba kija agi alima aküm aketer. Ajisüaka, Nagaland nungbo aiben police-tem uniform-bo asem saka mera maket, quality majung, button junga matang, longpant külen nepketa asem, tsüngsem lisobo memesü, polish-bo metepdang ta senzüya angutsü. Item nemji chiyongtsüa koma agütsüar ashitsü makok. Aji oda, state police ya temenünütsüka aser tetsübuttsüka masü saka saka aküm taket teyarir tajung ama nübertem tsüngdang litettsüla. Aji oda, police-i inter-state gate adena aruba aser aoba garitem nung ozüngi memelaba oset aser chiyongtsütem mita aputsü melen police gari nung dang belendaksüra, oset jenjangjibo sen crore meyerijang ka indang asütsüa akok saka iba jagi Naga nung akoksadaksübjibo sen crore million agia memenoktettsü. Tanü yangi Kerala tashi nung oagi Nagaland police gari senzüa mapa inyaksüsa akümba tia indang jembidang, Nagaland nung yimsüsür aser tulerter ya tsümar kar den nübertem meyong sen lemsatepa mechira jangramatemer asü (?) ta bilemer. Asenokbo yimsüsür aser tulerter süka tsümar kar teyari magira police department moutetter asü ? Supply department mapatema tsümar kar den tajangzüker lemsatepa meinyakra meinyakteter asü ? Tsümar ka nem Naga nung meyong sen mechidaksüra Naga nung sahibtemibo Delhi nung kecha mejembitetter asü ? ta tasüngdangba aika arur. Tang yabo joko Naga nung yimsüsür aser tulerter tetsüngda nung tsümar chanu ka mayu agibo center den jembitettsüla aser Naga nung public sen agi pei sen kümer mashimashi amshia tsümartem den lemsaa magitsüla aser mamshitsüla.

OLEMSABANG

'Kütsü Sarasadem' ken nung tai aliba medongshidi Correction of unaware, unforeseen, unrealized errors

- Tsüknung Penzü, Dimapur

(Taoba adok nungi...)

(d) Stanza 1 : Lar chir jagiang tetsü temeim toktsü ama AOKK ken nung angateter.

Stanza 1, verse iii nung yamai angur, "Tang nai toktsür kü temeim". Tang AOKK nung iba ken tokong translation ya agibo oda tetsü kadi asoba lar chir (male or female) jagiang tetsü temeim toktsür aoba amai angateter. Anungji tetsüji tera jashia, "Kü sarasadem tamatok" ta ashir amai angatettsüsa ken ya meyipogo.

Ibai drama mesükba, dramatic hymnal ka lir. Iba ken drama nung ashiba agi, tetsü ka tantsür kümer joko tasütsü mapang nung lar chir (her child) dang, "Ni na yakta toktsür aotsü asür akodang, ni or külen (ni asüleni or külen), ni na asoshi sarasademtsüba ya tamatokma no !" ta ashiba lir. English nung, verse iii nung, "You're leaving now my tender care ; ..." ta alibaji "You are now leaving (by me) ta ashirba. Ken ya sangruyim nung (in rhyming method) mejemba asünungji "You're" ta asüba jagi joko 'by me' ta asüabajibo 'tangatet dang, (understood) ta asüba nung, rhyming liro metemtsü asoshi yamaji yangluba ta angateter.

Kü suggestion translation ya agizüktetra ya agiang otsüji perija atener ta kü tangatetba lemsateper. (Ref. my translation).

LEPLAZÜ NUNG TEMELENSHITSÜ KECHA MALI

(e) Stanza 2 : Tetsü nungi tepela anguba la sür külen lar chir-i bilemteter.

AOKK translation nung stanza 2 nungji tetsü jagi tang-a (even now) (asülen nungi) pa/la den ola tila agi jemba pa / la peladaksür amai ken nungji angateter.

Saka ya la akümlidang la ola tajung jagi lar chir peladaksüba, aser tang tetsü sür iba tesüba tepela lar chir-i bilemtetba indang ken atenba lir. Kü suggestion stanza 2 translation nung ni yamai tesüba tepela bilemtetba sayua yangluogo.

(f) Stanza 3 : Tetsü akümlidang sarasademba lar chir nüklai arur.

AOKK translation :

(i) Tetsüji tang kotak nung mesüra tesem ka nung menden ka nung mena anguba aser ajiang mamateter amai angateter.

(ii) Tanga (other) ; tang-a (even now) : ojang ana ya maiteptsü atema 'even now' = tang-a' ta asüba nung dash (-) tatsüka inokdi.

(iii) Kümtem süitem... ta stanza 3, verse i nung aliba ya sangruyim olen (poetic sound) masü, ken aser poetry den mapet. 'Küm aika süitema oaka' ta ni melener. (ai-ka süi-tema oa-ka).

Ibai, tetsü akümlidang aliba, inyakba, tang lar chir nükla dangi aruba (imagination) indang ashir. Kü suggestion translation nung ni oji sayuogo.

(g) Stanza 4 : Tatalokba (event) tama, bilemtetba tesü ta ni meyipa agütsür.

Bilemtetba tama aser tatalokba tesü (remembrance first and event second) ta English text aser AOKK nung sayua lir. Saka Ao nungbo tatalokba tama aser tesülen ibaji bilemtetba ta shia ni ken text-ji yanglushiogo. Kü suggestion translation stanza ajak nung sayuogo. AOKK translation ya 'literal translation aser kü re-translation-ji 'sense translation' ta agütsür.

(Taruba adok nungi...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Longsa Baptist Arogo: Revival Mungjen

~ Longsa Baptist Arogo

(Taoba adok nungi...)

Longsa Arogo nungi revival milak bener aortem rongnung kuli ka yamai lir. "Longsa Arogo nung Tanela sempet anguba aser Tanelar mapa khuret agizükba bener aoba taküm kuli. 1976 küm December 11 hokolbar anogo nung L. Anokwala Longchar, M. Jakjemtila Nüngsang, Kariluba par asem Chungtia yim dak nungi Longsa Arogoi atu. Honibar anepdang parnok züngia saker tenla kidangi oa Tsüngrem dang tatok nangzuka sarasadem, idangji par asem prongla Tsüngrem Tanelai kanga semdanga moatsü. M. Jakjemla temang nung tashitak aliba tanepba angu, aser tanela sempet tulu angu. Iba tepela temaitsü lai lar yim taka brihostibar anogo nung nüburtem asoshi khuret bena sarasadema amungtsü tenangzükba agi. Adianu Y. Kariluba Asemba dena Tsüngrem Tanelai jembia temenen tatokba angu aser ken anishitsü Tanela sempet angu. Aser L. Anokla dang Tsüngremi mangdang nung Kibuba Yisu Khrista kangki nung koda tepset, iba indang noksa sayua, laa mangdang anguba sempet agizük. Ano deobar nü temoatsü sentep nung la dang mangdang ka yamai sayu; Yisu Khrista temenen madak koda takok ngur shia aruba anepdang Mary dangi Tsüngrem koda jungkai adok, yamaji la dang sayua liasü. Item tajangshiba den Longsa arogopuri onok dang Lai nungi koda lumitsü, tanela agi sünga alitsü, aser Tsüngrem sentong metettsü idang sayu. Aser parnoki ashi nenok asemi bener aobaji Revival ji ner arogo nung jangrudakjang aser brihostibar shia yimti nübur atema sarasadem mungang ta nungloksü. Anungji par asem iba khuretji bener December 15 nü Longsa nungi apuso. Kodang Tzüla ayong atong, parnoki Longsa yim tsütsü shir temoatsü meshia sarasadem aser Tsüngrem Tanelai parnok kanga semdanga moatsü. Yamaji parnok lenmang nung belema jajaba memeteti yim tonga arudang, parnoki teka mekanga par yim tsütsü shir ozü yimtsung aser arogo nung asentenshi tulu adokdakjang, lokti balala, kija shia tanela mapa agi süngdakjang ta sarasadem. Parnok yim tonger mezüng brihostibar anepdang tetsür sentepi ao saka sentep temli dang tenla kiji shibangatok, anungji iba anogo nungji brihostibar mung mezüngbuba Lt. Longritsüngba kidang sarasadema mung tenzük. Iba amungba nükjidongji: Chungtia Arogo nung Tsüngrem Tanelai amangbapur ajak yanglushija asentenshi tulu adokdakjang ta aser Tsüngrem Tanelai mapa tulu inyaksü tenla ki lapokjang ta teti sarasadema liasü." (Chungtia Baptist Arogo: Brihostibar anogo piyong sarasadema munga aruba Küm 25 Jubilee otsü kaket, 1976- 2001, tapak 7-9).

1973 Küm Tanela Temeshi milak bener, temeket kin balala arogo 73 dangi osang aben. Item rongnung Kohima Ao Baptist Arogo ya ka liasü. Iba arogo semdang dang Deacon Pangerkümzüki yamai ashi, "Ao lima yimtsung arogo ajanga Kohima Ao arogo semdangbaji Longsa arogo ya mezüngbuba lir". Ao arogo balala nung revival metsü proka jajadang sayatonya jenti ataklok. Item rongnung tatalokba ka yamai: Tsüngrem Tanela tejembiba ajanga Longsa arogo nungi tetsür telok ka Küpza arogoi ao. Iba anogo nungji Indian army-i par lushi nung mi senokja alushi ajak rongdok. Anungji tangari tetsür telok dang "nenoki miji ajanga motettsü" ta ashi. Aji saka, parnoki Tsüngrem dang iba miji ajanga otettsü lenmang lapokjang ta sarasadem aser parnoki mi tesashiji ajangdanga otettsü Tsüngremi lenmang lapokja ani. Parnok yim tonger yim dak alir tetsürtem ajak tenla kidang jatena merok mi remseptsü asoshi tsünglu anung nungi yokang ta sarasadem aser iba mapang nungjisa Tsüngremi tsünglu yoka miji remsep. Iba sayatonya mapaji ngua, Kupza nunger aikati kecha tarendak makai revival milakji agizük. (I.Yabang, Asendenshi Milak, 2005, tapak 36-37).

Longsa Baptist Arogo nung Tsüngrem Tanela Revival Milak adoker küm 50 abensadang arogo tejen record aser otsü lusia repringdangdang Ajak Takoksang Tsüngremi Longsa Arogo ya alima kintem asoshi "Tanelar Khunendong, Revival Mungjen, aser Missionary arogo" ka asütsü shimtetba kuli ngua Tsüngrem nem dang khonang nüngsang ajak agütsür. Küm 50 tejaklen Tsüngremi Longsa arogo balaka nung moaja shimtetba nükjidongji ataloktetsü asoshi tanü lanu putui Tsüngrem nisung Rev. Dr. Imchayanger aser tesayur Tsüknung President IEF den Tanela nung teshitetertem jaoka yimti süngküm shipanger "Kibuba, onok tanaben asentenshijang" ta ayimtena amunger.

ANO GO ABEN TSÜNGREM DEN

SHISADANGBA AJANGA AZÜKARU ASÜR

'Saka pai Kibuba ozüng nung jangra atemer, aser pa ozüng nung mangli-sangwali pai shisadanger. Ayongküm nung atemba süngdong, kobai pei tsüngküm nung tejang tangtsür; pa aji mesüka lir; pa toa mazular; pai kechisa inyakdir azükarur.' - T. Ken 1 :2-3

Tenüngsang ken tapu ka ya aika asoshi temeimba tapu, kechiaser iba tenüngsang ken nung tamanger ka asoshi azükaru aser yimji-yimjung nung aliba tongtipang sapi angur. Aser iba sapiji 'SHISADANGBA'. Mangli sangwali shisadangba ajanga azükaruba dang masü saka iba jagi asen jakla-a Tsüngrem mesükba nung azüker.

Charles Spurgeon teshisadang akaba indang ka ashibaji, 'Ni kaket aika azüngba shisashir tajung ka masü saka ni kechi azünger iba nung kanga teshisadanger ka lir, Sayutsüngiba tajung aika angashibaji masü saka nai kechi angashi iba nung kangashidangbaji lir.'

Tsüngrem O nung kanga teshisadang aliba ajanga iba nung ochi kechi lir aser nü tanela asoshi tapet chiyongtsü kechi lir aji bener arutsür, Na Tsüngrem mesükba nung yanglu.

SARASADEM:

Kibuba, ayongküm nung atemba süngdong ama alitsü: kü nem teshisadang kua. Amen

Kirk Franklin-i 2017 Special Merit Awards kenten sentong nung shilem agitsü

New York, June 11

(Agencies): 2017 Special Merit Awards angur nem tetushi agüja Grammy-i July 11, 2017 nü kenten sentong ka agitsü aser iba nung Gospel kentener Kirk Franklin-ia shilem agitsü shimogo.

Iba sentong ya New York City nung aliba The Beacon Theatre nung ayongzüksü.

Taküm Lifetime Achievement Award angurtemji Shirley Caesar, Ahmad Jamal, Charley Pride, Jimmie Rodgers, Nina Simone, Sly Stone, aser Velvet Underground nungertem lir.

Sentong nung GRAMMY winning industry icon Paul Shaffer-i musical director ama ketdang asütsü aser sempet



angurtemia shilem agitsü.

Taküm Lifetime Achievement Award angurtemji Shirley Caesar, Ahmad Jamal, Charley Pride, Jimmie Rodgers, Nina Simone, Sly Stone, aser Velvet Underground nungertem lir. Sentong nung GRAMMY winning industry icon Paul Shaffer-i musical director ama ketdang asütsü aser sempet

Iba kenten sentong nung GRAMMY nominee Andra Day-i Simone nem tetushi agütsütsü, GRAMMY 12 tashi angur Kirk Franklin-i Caesar nem, GRAMMY angur Randy Newman-i Ostin aser GRAMMY ana angur Dwight Yoakam-i Rodgers nem tetushi agütsütsü.

Longsa arogo nung revival adoker küm 50 ajungba tanelar benjong amung



IEF tir Tsüknung

Longsa, June 11 (TYO): Longsa Baptist Arogo madak Tsüngrem Tanela temeshi revival milak mekuploker küm 50 ajungba tenung nung Pai inyakba mapatem bilemteta "onok tanaben asentenshijang" omen dak rangloker Longsa yim dak June 9 nungi 11 tashi tanelar benjong sentong tulu ka ayongzuka kaogo.

Sentong nung Tsüngrem osangbenerji; Rev. Dr. Imchayanger aser IEF tir Wb. Tsüknung tena liasü. Iba sentong nung Longsa sensosanger bendang balala nungi aika atenshia temoatsü ngua denogo.

Deobar temoatsü sentep nung tesayur Tsüknung-i jembidang, asentenshi (revival)-ji konang nüngsang aser

nisunger purapujiba ka dang süra ibaji lisem manung ki asüba amato yipru balala arudang yakta ponger aotsü, saka Tsüngrem sentsüwangshi asoshi süra ibaji lung manung nung yangerba ki mesüka yipru balala aruaka kodanga melaotsü, ta ashi.

Paisa revival nükdang akangshitsü asoshi Lai o

tesayuba kar agütsüdang, ajemalubaji revival kimung aser nükmeng tongtibangtiba lir, ta ashi. "Revival tulutiba aser tajungtibaji ajemalua shirnoki Tsüngrem den jajar parnokji lir, anungji, ajemaluba nükmeng dak ajemdaker noktaksüla", ta paisa tayongzükba ka agütsü.

Revival temaotsü indang kuli kar lemsatepdang, shirnoki pei sasa ajemalua lenmang tamajung nungi meyipdir, idangji Pai parnok temenen atoktsü aser parnok aneptsütsü, ta Laishiba nung Tsüngremi nangzükba indang pai ashi.

Tsüngremi asükümer nokdang saka ajemalur nem taochi agütsür, ajemalur nem tepela renlokdahtsür, meshitetba tepela aittsü aser ajemalurtemi kechi meshidir Tsüngremi agütsür, ta ashi. anungji, "revival tajungtibaji ajemaluba nung amendaktsüla", aji ta süra, "kecha agia manokshitsütettsü", ta paisa shisem.

Ajemaluri tangar küboki air, ajemaluri mepishir, ajemaluri pei dang nungi pi tajungba ta bilemer, anungji, ajemalubaji revival nükmengi lir, ta paisa ashi. Ajemalutsübjaji nisung shi kisüng agi dangbo makoktsü, ajemalutsübjaji Yisui dang agütsütet, anungji, nisung shia dak Yisu tobur ajung ngudaktsütsü asoshi sayutsüngirisa ayongzuka liasü.

Longsa lima mezüng revival metsü perokba nung tongti shilem agir; asür Rev. Riküm (Mangmetong), asür Masarenla, asür Imsürenla, asür Aolemla aser taoba Longsa Baptist Arogo pastor Tsüknung nunger nem Longsa arogoi naroküm balala agüja nüngo kulikaket kaka agi senpettsü.

Sentong nung tsüngibangir (counselors)-temji; Amenla, Ayangla, Tianla, Rarenkala, Mapula, Merangba, Jongpong, Limatemsü aser Toshimanen nungertem liasü.

OLONG PAITEP # 4448

| | | | | | | | | | | |
|----|----|----|---|---|----|----|----|---|---|----|
| 1 | | | | 2 | | | | | 3 | |
| | | | | | | 4 | | 5 | | |
| 6 | | | 7 | | | | | | | |
| | | | | | 8 | | 9 | | | 10 |
| 11 | | | | | | | | | | |
| 12 | | 13 | | | | | 14 | | | |
| | | | | | | | | | | |
| | | 15 | | | | | | | | |
| | | | | | | 16 | | | | |
| | 17 | | | | | | | | | |
| | | | | | 18 | | | | | |

TIPIEN

- 1. Yakob tetsü - (6)
- 4. Mezüng nisung - (4)
- 6. Tasen lai kakat ka - (5)
- 9. Aou lanu - (2)
- 12. Tejen lai 21 buba - (11)
- 15. Tekolak tembar - (2)
- 16. Zütsüra anepsang - (5)
- 17. Kain tenu - (4)
- 18. Hana-er jabaso - (6)

LANGTSÜNGLEN

- 2. _ _ _ gki - (3)
- 3. Te _ _ ndang - (2)
- 5. Tsüngremi mezüng poktetdaksüba - (5)
- 7. Tia - (4)
- 8. Yakob-er jabaso ka - (5)
- 10. Abraham tebutü - (4)
- 11. Rebeka tebuba - (4)
- 13. Esau tenu - (5)
- 14. Tzünglu tilala aru - (4)
- 16. Jafet tebu - (3)
- 17. Teka agi kongshi - (2)

OLONG PAITEP # 4447 TELANGZÜBA

TIPIEN :

- 1. Tesempatsü, 4. Zübi, 5. Chisem,
- 9. Benjung, 11. Kimong, 12. Akok,
- 13. Tongtibang.

LANGTSÜNGLEN :

- 1. Tzüzü, 2. Sai, 3. Alizüng, 5. Chijang,
- 6. Monü, 7. Sentong, 8. Ayok,
- 10. Arong, 12. Awa.



TEBUI ALOKBA MOZÜ ALITSÜ YOKER

- Tebu** : Hi!! Alok, obala mozü achitsü mapang atonger, anungji nabo minute 20 tashi nungbo alir arung.
- Alok** : Malik, malik..... iba mozü ya kua!!!
- Kibur** : Iba mozü yabo kanga tesashi anungji, nai iba mozü machidang mamatzü cup ka jemer-ang chiang no....
- Alok** : Oba, Mozü tu tang-ang bener arur....
- Tebu** : Kechiba yamai menurang bener arur, obala joko tasür dang....
- Alok** : Oba, mozü ayokertemi ashi angaba ajanga menurang arur adi.
- Tebu** : Parnoki kechi ashi??
- Alok** : Oba, na... iba mozü ya kanga tesashi, anungji mozü machidang mamatzü cup ka jemerang chiang ta asüba agi ni joka nung mamatzü cup ka molua jemer ang bener arutsür.
- Tebu** : Oh!!!! Alok.....

Lilir : S, Dimapur

TANÜBO NAI LANGZÜANG

- Q. NITI Aayog ya 'SATH' mapatong kübok tenzükogo, sürapangla 'SATH' ojang talangbai adokba shitakbaji kobala ?
- [A] Sustainable Action for Transact Human capital
- [B] Sustainable Action for Transforming Human capital
- [C] Sustainable Action for Trance Human capital
- [D] Sustainable Action for Trace Human capital

(Taruba adok nung onoki langzüsü)

YASHI ADOK TELANGZÜBA : Hoshiar Singh

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga züur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.


Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA

2017 KÜM INDANG BOLLYWOOD FILM TEM TANG TASHI NUNG TAJUNGTIBA ASER SEN TEIMTIBA NGUTETA ALIR FILM 10 YAMAI ALITSÜ.



| RANK | FILM TENÜNG | INDIA NETT (CR) |
|------|--------------------------|-----------------|
| 1. | Baahubali 2: Hindi | 506.53 |
| 2. | Raees | 139.00 |
| 3. | Kaabil | 126.85 |
| 4. | Jolly LLB 2 | 117.00 |
| 5. | Badrinath Ki Dulhania | 116.60 |
| 6. | Half Girlfriend | 58.71 |
| 7. | Hindi Medium | 58.66 |
| 8. | Sachin: A Billion Dreams | 50.00 |
| 9. | Naam Shabana | 36.50 |
| 10. | Phillaari | 28.40 |

SUDOKU # 3561

| | | | | | | | | | |
|---|---|---|---|---|---|---|---|---|--|
| | 7 | 8 | | | | 5 | 1 | | |
| 6 | | 4 | | 5 | 7 | 3 | | | |
| | | | | 6 | | 8 | 7 | | |
| | | 6 | | 2 | 5 | | | | |
| | | 9 | | | 8 | | | | |
| | | | 1 | 6 | 8 | | | 2 | |
| | 3 | 1 | | 4 | | 2 | | | |
| 4 | | 2 | 3 | | | 7 | | | |
| 7 | 8 | | | 2 | | | 4 | | |

TELANGZÜBA # 3560

| | | | | | | | | | |
|--|---|---|---|---|---|---|---|---|---|
| | 6 | 8 | 9 | 1 | 3 | 5 | 2 | 4 | 7 |
| | 2 | 1 | 3 | 7 | 9 | 4 | 6 | 8 | 5 |
| | 5 | 7 | 4 | 2 | 6 | 8 | 1 | 9 | 3 |
| | 7 | 4 | 8 | 9 | 5 | 1 | 3 | 2 | 6 |
| | 9 | 3 | 5 | 6 | 7 | 2 | 8 | 1 | 4 |
| | 1 | 6 | 2 | 8 | 4 | 3 | 7 | 5 | 9 |
| | 4 | 2 | 6 | 3 | 8 | 9 | 5 | 7 | 1 |
| | 3 | 9 | 1 | 5 | 2 | 7 | 4 | 6 | 8 |
| | 8 | 5 | 7 | 4 | 1 | 6 | 9 | 3 | 2 |

OJANG LUTEP # 4056

- APDIMUR : □□□□□□□□
- MALAA : □□□□□
- ATSTÜK : □□□□□□
- ALTEM : □□□□□
- PAMANG : □□□□□□
- OOSCHL : □□□□□□
- NURTATEM : □□□□□□□□
- SZÜTSENÜ : □□□□□□□□
- NGKAA : □□□□□
- LEMTTEBISÜ : □□□□□□□□□□

OJANG LUTEP TELANGZÜBA # 4055

PELASHISHIA AGÜTSÜBAJI TEMOATSÜ SAKA KARI NUNGNANGA AGÜTSÜRA IBAJIBO JAKDAKA AYATAI

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries
21/3-19/4

Nai osang tasen ka angashitsü. Taküm nung tetsüktaktsütem nungi majentsüla. Tang nai ajangshia aliba tebilemtsü ajak koktettsü merangang. Tanü nai inyakba ajanga asüng lenmang tasen lapoktsü.



Taurus
20/4-20/5

Tanü nü shisatsü mesüngjemteti alitsüa akok. Nü teinyaktsü khuretem nungi ajentsü merangba ajanga na asoshi lenmang dang shibangtsü. Khen junga süngjemshir shisadangba sülen mera agiang.



Gemini
21/5-20/6

Tangar den mangatettep nungi pilaa alitsü merangang. Nü shisatsü azüoktsü merangang. Tangar tebilemba dang nungi nü tebilembaji khenyongi balaka asütsü.



Cancer
21/6-22/7

Ainlen senzütsü asoshi anogo tajung ka asütsü. Nü dak tashi tasen balaka alitsü. Tanep nai temoatsü kar ajurutüsa akok. Tanü mapa tasen kar tenzükba nung ajungtsü.



Leo
23/7-22/8

Tanü na teinyaktsü mapa aika alitsü. Nai nü sempet tajungtiba nung amshitetsü. Tangari aijaka nü lenmang nungi masetshitsüla. Nikongdang 3:00 nungi 5:30 ako mapangji na asoshi tajung asütsü.



Virgo
23/8-22/9

Tangar den sensaksemba ajanga na kanga ajangzüktsü. Tanü nü sentong nung temelenshi kar adoktsüa akok. Tanü dang nungibo asüng anogo tajungba asütsü.



Libra
23/9-22/10

Tanü na teinyaktsü mapa aika alitsü. Nisung kari parnok maparen ajanga nü mapa nung tetsükdaktsü bener arutsütsüa akok. Mapang amshi ashiba ajanga takok angutsü.



Scorpio
23/10-21/11

Kidang kibok kisemer alitsü. Mapa inyaktüsüa tongtibang saka anisüngzüktsü aser südoksünemtsü asoshia mapang lateta ayutsüla. Tanü nai shimtetba lenmangji tarutsü asoshi kanga tongtiabng asütsü.



Sagittarius
22/11-21/12

Na teinyaktsü mapa aika alitsü. Na kanga anibelemtsüsa mapangi bener arutsütsü. Asüng anogo asoshia nai tebilemtsü akatsü. Anisüngzüktsü asoshia mapang lateta ayutsüla.



Capricorn
22/12-19/1

Nü sentong nung temelenshi kar adoktsü südi. Nü dak aliba miim ola nungji nai tamang katettsüla. Medemertem den tongtepratepba ajanga na ajangzüktsü. Nü lenmang nungi masetshitsüla.



Aquarius
20/1-18/2


Nü taküm nung temelenshia kar nai jangjatsü. Tanü nai tongtibang telemtetba kar agitetsü. Kinüngertem nem mapang agütsütettsüla. Nü dak ajungmesoba tanela ka alitsü.



Pisces
19/2-20/3

Nü dak melung lemtetba shisatsü alitsü. Nü dak tetoktepba shisatsü alitsü. Nisung kari na melungsoa yaritsü. Tang na takok lenmang nung jajadagi. Senotsü nunga tia junga lir.

India nung Ed Sheeran kenten sentong ticket July nungi ayoktsü



Mumbai, June 11 (Agencies): Grammy Award angusang British nunger kentener, Ed Sheeran India nung kenten sentong indang ticket mezüngbuba shilem July nungi tenzüka ayoktsü, aser ticket jenjangji sen 4,750 nungi tenzükter. Iba kenten sentong ya pa indang World tour Asian leg shilem ka lir, aser item sentong nung pai pa indang studio kensep asembuba "÷(Divide)" ajungkettsütsü. Iba kensep ya

March 3, 2017 nü sayaa liasü. Taküm November 19 nü JioGarden, BKC Mumbai nung iba sentong akatsü. Iba concert atema online entertainment ticketing platform BookMyShow asoshi International concert promoters-AEG Presents aser PR Worldwide longjemer inyaker. Ticket ji iba site ajanga dang angutsü, ta sangdong ka nung metetdaktüsü. Ticket atema registration ji

July 4 nü tenzüktsü aser July 12 nung register süa alirtem dang ticket ayoktsü. Live Events & IP, BookMyShow tongti, Kunal Khambhati-i, "Onoki Ed Sheeran agizüktsü yongyar aser iba sentong takok junga angutsü atema inyaktüsü," ta metetdaktüsü. Mumbai dak alia Sheeran-i Taipei, Osaka, Seoul, Tokyo aser Bangkok yimitem nunga kenten sentong akatsü.

Katrina Kaif ya superhit film atema machine ama lir: Ranbir Kapoor

Mumbai, June 11 (Agencies): Actor Ranbir Kapoor-i ashiba agi, Katrina Kaif ka actress tongti ka lir aser mapang shia lai shilem agiba film tem ajanga takok tulu angur. Tarutsü nung pai producer ka ama la atema dang film ka yanglunür ta Ranbir-isa ashi. "Katrina ya superhit film tem atema machine ka ama lir. Tarutsü nung, ki kodang film produce südir, la atema dang film ka yanglunür" ta pai Jagga Jasoos indang dilm ajangketba sentong ka nung ashi. Idangji Katrina Ranbir den külemi mena liasü aser lai "kangasa pelar" ta langzü. Taoba mapang Ranbir aser Katrina nati Ajab Prem Ki Ghazab Kahani aser Raajneeti film



tem nung külemi shilem agiogo. Ranbir-i tang Sanjay Dutt taküm otsü nung ajemdaker yangluba film nung shilem tagidak lir. Iba film ya Rajkumar Hirani-i direct asür. "Tesüiba küm ishika box office nung film tajung madok, saka ni Raju, Anurag Basu aser Ayan Mukerji nunger den külemi

mapa inyaktüsü maongka angu. Ni kü sasa ni tia taka aser temoatsü angur ta bilemer" ta Ranbir-i ashi. "Parnoki film nung mangdang tulu ayur aser ibaji kü nem sempet ama agütsür. Anungji, ni kü sempet ajanga, ibaji parnok nem meyiptsütsü imlar" ta paisa shisem.



Mumbai, June 11, 2017: Hokolbarnü Mumbai nung, cosmetic products atema shiruru dak tendangba ya alima tesem ajaklen nokdangtsü atema ayongba sentong ka nung Bollywood actress, Jacqueline Fernandez-i shilem agiba noksa nung angur.

TAN HOPTA ATEMA - KOMA SÜLA ?

Q. Center sorkari nashi maleptsü ozüng latetba ya magienra, Nagaland India kübok malitsü ta Nagaland nung aliba lokti tentetemi ola adok nunga koma süla ?

Adam West arishi kum 88 nung süogo

Los Angeles, June 11 (Agencies): Adam West shiba 1966-1968 ABC series Batman nung shilem agiba ajanga ajaki tali jangjaa meteta ali, pa arishi kum 88 nung süogo.

Par kinungertemi ashiba agi, pa 'leukemia' agi shiranga lir Hokolbar aonung Los Angeles nung par kidang asü.

"Temolung mepelateti iba osang lemsateper.. Adam West leukemia agi shiranga liyar yasung süngjem süngjema süogo," ta par kibong otongdar kati actor indang Facebook

page nung Honibarnü zülutsü. "Pa ajaki meima aliba tebu, kinungbo, obola ka liasü. Onoki pa menongraba tepang agi rasaa ashitsü kecha meli," ta kasa osang nung zülüja liasü.

West 1928 kum September ita 19 nü aso. Pa career kum 70 shi liasü aser iba mapang nung pai Batman nung 156 ben adoka liasü, koba record ka lir aser iba den külemi live-action television nung 120 ben aser animated series aika nung, ta shilem agia liasü.

Fox indang animated series

'Family Guy' nung Nutty Mayor Adam West of Quahog indang ola pa ola liasü koba ajanga pa ano ajaki tali meteta aküm. Pai taküm aliba mapang ola agi TV show aika nung shilem agia aruogo, item rongnung Disney Channel indang "Jake and the Neverland Pirates" dena lir.

Osang ajanga ashiba agi Hollywood Blvd, 6764 nung West indang star nung Honibarnü naro toktsütsü. Pa nem Hollywood Walk of Fame nung star 2012 April 5nü agüja liasü.

Beyonce'er kidang la tanur asotsü atema sen million \$1 indoktsü

June 11, 2017 (Agencies): Nüngtugu kentener, Beyonce aser la kinungbu Jay Z-na tanur jakrep asotsü atema sen million \$1 indoktsü sentong lir.

Tena chir ya kobi melie asotsü aser iba mapang tanur aser tetsü nungertem kumzüka ayutsü mechi Hollywood nung tena indang ki nung 'maternity suit' ajak inoktsü. 'Formation' ke atenlai osang ka ajanga ashiba agi, la kinungbu tena ki nung 'incubator' aser 'professional neonatal wing' oset tem bo ki tongtsüogo.

"Tanur jakrep kidang asotsü ya kanga temela masü. La

tanur asoba mapang nungdakra Cedars-Sinai Hospital-i anir aotsü asoshi ambulance ka renema atatsü. Jay Z kanga mazüngi senzüba angur saka Beyonce-bo kidang ajem-ajema lir aser anogoshia chiyongtsü tem gari ajanga bener arur," ta osang ka ajanga ashi.

Arishi kum 35 tain Beyonce aser arishi kum 47 tain Jay Z-na jala arishi kum 5 tain, Blue Ivy asoba mapang mangatettep adoka liasü.


Blue Ivy ya New York nung aliba Lenox Hill Hospital nung aso, aser iba mapang mozüki nung tanur asoba takdang

kisüng masü saka iba 'floor' ajunga amshitsü asoshi sen million \$1 agütsür amshiba ajanga tangar shirangertem timtem ajuruba osang angashia lir.

"Blue Ivy asoba mapang ya tena taküm nung tepelatiba anogo liasü saka iba ama osang prokshiba ajanga tenati tang bo tena kidang dang tanur ya asotsü lemtet," ta kasa osang ajanga ashi.

"Beyonce anepalutsü asoshi medical staff lir aser parnoki la dang mozüki-i aotsü shira parnok aotsü renema lir," ta shisem.

Nokia Active Wireless, Wired Earphones sayaogo



June 11, 2017 (Agencies): Iba earphone ana ya HMD Global-i earphone set ana; Nokia Active Wired aser Nokia Active Wireless earphones sayaogo.

Iba earphone ana ya outdoor activities tem atema yangluba lir aser ya dust aser water proof lir.

Nokia Active Wireless aser

Active Wired earphones nung inbuilt mic ka aser call agizüktsüba, ken pause/play asütsüba aser volume melenshitsüba control tem inoka yanglua lir.

Osang ajanga ashiba iba Wireless earphone tem nung Bluetooth 4.1 connectivity keta lir. Earphone touzükji gram15.6 aser 45X2mAh battery-a ka keta lir, koba ghonda 8 tashi amshitetsü. Nokia Active Wireless earphones charge asütsü atema Micro-USB cable den USB A port ka keta lir.


Tang tashi nung earphone indang jenjang India nung kwi asütsüar HMD Global ajanga sangdonga mali.



June 10 nü Myanmar yimtiba Yangon nung Ei Kyawt Khaing (tebelen)-i Miss Myanmar World 2017 pageant akokba sülen korang semtsüdag tangokba noksa nung angur.

Happy Birthday

TENÜNG : IMTISUNGIT AIER
Tasoba anogo : June 12
Küm : 9
Class : 3
School : Hope Academy



Tulusang Tsüngrem, nai jabaso Sungtiba iba alimai yoker kum 9 tashi arishi anir aruba asoshi kanga pelar aser Nü tenüng asanger. Ano maneni arishi talang den anema aliba taküm moajang ta mepishia sarasademmer.

-Temeim Oja, Oba, kinungertem

TENÜNG : MOABENLA
Tasoba anogo : June 12
Küm : 1
Talidak : Signal Angami, Dimapur



Temeim jala Moaben, na sor kum ka renteta arishi moatsüba asoshi Tsüngrem tenüng sanga nü tasoba senti anogomung tepela salem sangdonger. Tulusang Tsüngremi jala nem tetemjen arishi maneni moatsüang ta sarasademtsür.

Nü temeim Oja, Oba, Otsü, Obou aser kinungertem ajaki na kanga meimer, "Happy Birthday Ben Ben."

WeChat nung 'Anti-Fake news' feature sayaogo

Beijing, June 11 (Agencies): China nunger indang message zülutepba app, WeChat ajanga 'feature' tasen ka sayaogo aser iba app nung osang tiazi prokshibatem iba feature ajanga metetdaksütsü.

Iba app nung osang tiazi prokshiba ya Chinese censor, police mesüra osangbener nem metetdaksütsü, ta osang ajanga ashi.

China nung WeChat ya

kanga nüngtugu süa amshir. Iba app ya China nung message zülutepba kisüng masü saka mobile payment, chiyongtsü order asüba aser bicycle khen atema amshitsü asoshi iba app nungi inyakteter.

Iba feature ajanga nisung kati osang prokshiba ya tai ta metetra pa mesüra la dang iba osang metetdaksütsü.

China nung WeChat amshir nisung million 900 lir.

Alibaba Cloud-i India nung mezüngbuba data centre amenoktsü

June 11, 2017 (Agencies): Chinese e-commerce company Alibaba indang cloud computing arm, Alibaba Cloud-i India nung sangküm kum tetenzük tashi nungbo mezüngbuba data centre ka lapoktsüba Honibarnü sangdongogo. India ya Alima nung internet amshir nütsüng timtiba aliba tanabuba linük lir.

Iba data centre ya Mumbai nung 2018 March ita 31 tashi nungbo amenoktsü ta company ajanga metetdaksü, parnoki maneni Jakarta nunga data center ka lapoktsü aliba dena metetdaksü.

"Asia nungi adokba global cloud services provider rongnung Alibaba Cloud kija asütsü ta ni amanger, aser iba tesem nung innovative data intelligence aser computing capabilities tem nüburttem nem agütsütsü asoshi maongka kanga tajung lir," ta Shanghai nung 'Computing Conference' aliba mapang Alibaba Group Senior tatong tir aser Alibaba Cloud tir Simon Hu-i ashi.

"India aser Indonesia nung data centre tem amenokba ajanga iba tesem nung aser

alima ajunga nung onok jenjang tajungba akümtsü," ta Hu-isa ashi.

Alibaba group Vice President Yu Sicheng-i osangbenertem den jembidang ashiba agi, India ya cloud computing shishilembadak tajung ka asütsü. Cloud computing ajanga tamshirtemi computer indang hard drive nung masü saka internet nung data rizünga yutettsü aser access-a sütettsü, iba ajanga cyber-attack balala nungi pei data tem kumzüka yutettsü.

Tawa Malaysia nung data centre amenoktsüba sangdongba den külemi company-i Asia nung small and medium enterprises (SMEs) tali nguita yariba ajanga computing resources ajungkettsü merangtsü, ta metetdaksü.

Data centre tasen asem amekoktsü sendong aliba ajanga parnok data centre location 17 akümtsü koba ajanga mainland China, Australia, Germany, Japan, Hong Kong, Singapore, United Arab Emirates aser US ayimjema inyaktü.



June 10, 2017 nū Kazakistan yimtiba, Astana nung Shanghai Cooperation Organization (SCO) senden nung (abelen nungi ajichilen) India Ato kilonser, Narendra Modi, Uzbekistan Tir, Shavkat Mirziyoyev, China Tir, Xi Jinping, Kazakh Tir, Nursultan Nazarbayev, Russia Tir, Vladimir Putin, Tajik Tir, Emomali Rakhmon, Kyrgyz Tir, Almazbek Atambayev aser Pakistan Ato kilonser, Nawaz Sharif nunger külemi noksa ka tangokba angur.

Demonetization ajanga rongsenkettsüng ajemtsüa akok: SBI

New Delhi, June 11 (Agencies): Linük nung sen aputsür bank tulutiba, SBI-i, demonetisation ajanga maneni rongsenkettsüng jenjang ajema akumtsüa akok aser parnok maparen nung kongshitsüa akok, ta metetdaksü.

Yaküm November 09 nungi tenzüka Centre sorkari sen 500 aser sen 1,000 notes anenja liasü aser iba melena sen 500 aser sen 2,000 notes tasen adok.

Centre sorkari telemtetba ajanga, tarutsü nung India rongsenkettsüng aser banking sector nung koma kongshitsüar mejangjar, ta SBI-isa metetdaksü.

Tawa India nung demonetisation telemtetba ajanga bank indang business,

operations aser senotsü jenjang kongshitsüa akok, ta SBI-i Preliminary Placement Document ajanga investors nem metetdaksü.

State Bank of India (SBI)-isa, "Demonetisation ajanga India rongsenkettsüng jenjang ajema kümogo, aser maneni ajema akumtsüa akok, koba ajanga Bank indang business kongshitsü," ta ashi.

SBI-isa, Preliminary Placement Document nungji risks aser tarutsü nung koma asütsüar mejangjabatem indang shia lir, ta ashi.

April 1 nungi associate bank pongu aser Bharatiya Mahila Bank loktepba sülen alima nung tematiba bank 50 rongnung SBI densemogo (2016 küm jenjang

55buba nung liasü).

SBI indang balance sheet size ji sen lakh crore 33 lir aser parbok indang bank branch 24,017 den ATM 59,263 ajanga customer crore 42 tenzüker.

Tawa osang ka ajanga, Yaküm Narendra Modi-i aniba Centre sorkari benokba demonetization ajanga India indang GDP ainba shilem 6.1 tashi ajema aluogo, ta sangdonga liasü.

Central Statistics Office (CSO) osang ajanga metetdaksüba agi, 2016-17 küm tatemsabuba ita pezü nung India'er Gross Value Added (GVA) shilem 5.6 tashi ajema alu. 2015-16 küm India'er Gross Value Added (GVA) shilem 8.7 liasü.

Centre mapatongtem ajanga aluyimba nung timtem adoker: BKS

New Delhi, June 11 (Agencies): Linük nung aluyimertemi sorkar dang nungi senotsü teyari meshia takhangba agütsüba mapang ka nung RSS den affiliate süa aliba aluyimer tenet, BKS-i, Centre sorkar mapatongtem ajanga linük nung aluyimba tsütsü timtem adoker, ta tai tongloktsüogo.

BKS National Secretary, Mohini Mohan Mishra-i, Centre sorkari aluyimertem atema tongtibangsüa meinyaker, aluyimertemi parnoki alu nungi züsentetbatem nung sen tali meshia akhanger, ta ashi.

"Centre-i talirtem aser chiyungtsü nung sen atuba atema dang bilemstür. Sorkari aluyimertem atema mebilemstür," ta Mishra-i osangbener dang ashi.

Paisa, "Aluyimertemi aluyimba dak sendakba osettem maximum retail prices (MRP) agi alir. Süra kechiba parnok nem minimum selling price (MSP) agütsütsü?," ta asüngdang.

Mishra-isa, "Tanübo aluyimertemi parnoki züsentetba atema sen shitak mangur," ta ashi.

Iba denji kasa sorkari wheat nung import duty ajema

kümtsüogo, ta ashi.

Tang Madhya Pradesh nung aluyimertemi longkak aitba dak sendakba nung Mishra-i, tang state nung mepetmesü adoka aliba ya meshitaki inyakba kuli kar ajanga lir, ta ashi.

"Ajisüaka state sorkari aluyimertem züsentetbatem atema nüngdakba mapa meinyakba ajanga aluyimertem jashi," ta paisa metetdaksü.

"State sorkari aluyimertem anema mapatong balala benokba anema June 15, 2017 nū nungi tenzüka BKS-i mapang telatet ka makai longkak aittsü," ta paisa metetdaksü.

Maharashtra sorkari aluyimertem dang sentsüh atoktsü sangdongogo

New Delhi, June 11 (Agencies): Deobarnü Maharashtra state sorkari aluyimertem dang parnoki sen apua aliba sentsüh atoktsü telemtetba agia iba osang sangdongba sülen aluyimertemi longkak aittsü sentong yanglua aliba thiogo.

Tanü osangbener den jembidang aluyimertem lenir, Rahu Shetti-i, "Loan agiba sentsüh atoktsü atema sorkari nangzükogo, aser tanga takhangbatema ataloktsütsü ta nangzükogo.

Parnoki nangzükba ama meinyakra onoki ano July 25, 2017 nungi tenzüka longkak aittsü," ta metetdaksü.

Tanep longkak aiter aluyimertemi chief minister Devendra Fadnavis-i tentetba minister tem committee ka ajurua senden mena liasü.

Maharashtra nung aluyimertemi tesüiba anogo 11 tashi takhangba agüja arua liasü, aser parnok takhangbatem mataloktsüra parnoki June 12 nungi longkak tesashiba aittsü, ta amokmerena liasü.

Aluyimertemi state sorkar dang akhangba onüktem rongnung: farm loan sentsüh atoktsü, parnoki züngsentetba chiyungtsütem atema jenjang shitak agütsütsü, tzü mesür arutsü atema senotsü teyari agütsütsü, arishi küm 60 dak temapur aluyimertem nem pension agutsütsü aser MS Swaminathan Committee tentetsü densema lir.

Taoba hopta Maharashtra nung aluyimer million tesadang kati item takhangba agüja longkak ait tenzüka liasü, aser iba mapang nungi aluyimer pongu tashi süogo.



Belagavi, June 11, 2017: Madya Pradesh sorkari aluyimertem anema inyakba aser police-i Congress lenir, Rahul Gandhi Madya Pradesh-i aittsü nokdangba anema Deobarnü Belagavi railway station anasa Youth Congress nung inyaker züngsemtemi longkak aitba noksa nung angur.

Deepak Jayakumar aser Sasikala nati Jayalalithaa tepsettsü merang: Deepa

Chennai, June 11 (Agencies): Taoba Tamil Nadu Chief Minister asür, Jayalalithaa'er adianu chir, Deepa Jayakumar-i, Deepak Jayakumar aser Sasikala nati sentong yanglua Jayalalithaa tepsettsü merangogo, ta tanü metetdaksü.

Tanep 10:00 ako meta Deepa aser la kinungbu, Madhavan nati Jayalalithaa'er ki, Poes Garden residence agitsü atema aru, saka security sepaitemi parnok nokdanga liasü.

Deepa-i ashiba agi, VK Sasikala'er kinunger aser AIADMK Amma Deputy General Secretary TTV Dhinakaran atema inyakeremi la nokdang.

AIADMK Amma camp nungi osang ka ajanga ashiba agi, Deepa-i jelia sentong memetetdaksüi ajungbena Poes Garden residence semdang aser tenü, Jayalalithaa noksa nung narozük azüksünüa liasü.

Deepa-i kima aliba Jayalalithaa noksa nungi naru azüksü, iba sülen lai ki telungi

tunüa liasü, saka la nem temelaba magütsü.

Iba mapang nungji Deepa'er adianu, Deepak Jayakumar-a kidangji liasü.

MGR Amma Deepa Peravai tentetsang Deepa-i, Jayalalithaa tepsetba atema la adianu, Deepak nem temerenshi agütsütsüla, ta ashi.

"Ni ki telungi mayaketdaksü. Deepak Jayakumar-i Sasikala den adenba ajanga onok ashioksür ama bilemer," ta Deepa-i ashi.

"Pai-a (Deepak) Sasikala ama aibelena lir. Jayalalithaa hospital nung amungdang pai la (Sasikala) den senteper la tepsettsü merang. Parnoki sen atema ibaji inyaker," ta laisa metetdaksü.

Jayalalithaa taküm alidang aliba ki, Poes Garden nung tang AIADMK general secretary VK Sasikala lidar.

Jayalalithaa-i la taküm alidang senmang atema kecha zülua medoktsü, ajisüaka lar adianu'er chirtem- Deepa aser Deepak nungeri ibaji senmangtsüla ta bilemer.



June 11, 2017 nū Visakhapatnam, Andhra Pradesh nung Urban Development, Housing & Urban Poverty Alleviation and Information & Broadcasting Union Minister, M. Venkaiah Naidu-i "Sabka Saath Sabka Vikas" Sammelan tenzükja milen tsüklokba noksa nung angur.



Philippines, June 11: Philippines nung aliba Marawi yimti nung Maute telungpur temi agia aliba tesemtem rakzüksü mechi raraba mapang yirur aliba mitkartem Cagayan De Oro mozüki nung aliba Philippines tir, Rodrigo Duterte-i semdanga sempet aser sen agütsüba noksa nung angur.

Trump-Russia tesendaktep ken o nung Sessions-i kuli agütsütsü

Washington, June 11 (Agencies): US nung mapang talangka senator inyaka aruba sülen US tir, Donald Trump-i par linük nung Attorney General inyaksü shimsang, Jeff Sessions-i taruba hopta Congress nung oa pai Russia nunger den ken o jembiba kuli agütsütsü.

Taoba küm US tir atema election nübuyim mapang Sessions-i Trump yari aser pai shidangba o nung ajemdaker FBI director, James Comey ya mapa nungi anentsü.

Russia dak sendakba ken o nung Sessions-ia shilem agia lir, ta temolung melemtep adok.

"Iba mapang pa dang asüngdangtsü aika adoktsü," ta ken o angadanger Democrat telok nungi Senator, Patrick Leahy-i osangbener dang ashi.

Senate Appropriations Committee ajanga US Attorney General ya senotsü amshiba kuli agütsütsü jaok. Saka yashi senator ajanga Sessions aser Russia tesendaktep indang asüngdangtsü osang sangdongba sülen Sessions-i

sentong melenshia Senate Intelligence Committee dangi aotsü lemtet.

"Senate Select Committee on Intelligence nung Comey-i kuli agütsüba nung ajemdaker, iba ken o indang jembitsü tongtibang," ta Sessions-i pa sentong melenshia züluba shidi nung shia lir.

"Iba amala ken o jembitsü atema intelligence panel ya tim lir, kechiyong iba telok ajanga bushisüngdang asür aser parnok ket nung tongtibang aser shingaia memetetba osangtem yua lir," ta Sessions-isa shisem.

Osang kar ajanga ashiba agi, Trump aser Sessions tsüngta mangatettep adokba ajanga pa mapa nungi anentsü ashi, aser US tir-i Sessions dak temolung lemteta ali-mali telangzüba kicha White House-i Mongulbarnü mashi.

Russia den tesendaktep ken o bushisüngdangba nungi Sessions-i pa-sasa pa kümzüka ayutsü südi ta ajiteter, ta Comey-i shia liasü.

Arishi küm 70 tain, Sessions ya Alabama state nungi lir aser

Senate nung küm 20 tashi inyaka arur aser pai Trump nübuyim nung shilem agia liasü. Aser January ita nung ken o angadamba mapang pai Russia nunger ketdangser kata majuru, ta shia liasü.

US tir atema election nübuyim mapang Sessions-i Russia ambassador, Sergey Kislyak anaben ajuru, ta March 1 anogo The Washington Post ajanga ashi.

Iba osang sangdongba sülen Sessions-i mapa nungi anentsü shia liasü.

February 14-nü White House nung senden tembangba sülen Comey dak alaka Sessions densema Oval Office yutsür aotsü asoshi Trump-i ashi.

FBI tekolakba kümzüka ayutsü asoshi Attorney General-i tim mapa meinyak, ta Comey-i taoba hopta kuli agütsüba mapang shia lir.

Iba senden tembanger nisung ajanga senshiba sülen Trump-i Comey dang mapa nungi anentsür alisang, National Security Advisor, Michael Flynn ken o bushisüngdangba anentsü ajungshi.

DUP teyari ajanga Britain nung May-i sorkar tentettsü

London, June 11 (Agencies): Taoba hopta election nung tamakok aluba sülen Democratic Unionist Party (DUP) den tezüngzüktep tasen ka agia Britain nung Theresa May Ato Kelonser inyaksü.

Taoba Brehostibarnü Britain election agiba nung May'er telok, Conservatives Party-i parliament nung menden timba ngua sorkar tentettsü maongka mongutetba ajanga lar teloki Northern Ireland indang DUP telok nungi MP 10 teyari agia sorkar tentettsüsa aküm.

"Democratic Unionist Party-i 'outline agreement' nung molungtepa agizükogo aser Conservative sorkar yaritsü," ta May indang odongtar-i tanü osangbener dang ashi.

"Iba tezüngzüktep ajunga ya Hombarnü cabinet senden nung benoka jembitsü aser iba sülen parliament senden tasenba amentsü," ta odongtar-isa shisem.

Tanur raksa-a indokba aser teburtem-i tebur den kibong akümba anema nokdaker telok, DUP ajanga Conservative Party dang kechi taginübatem meshia aliar iba olen kata meshisem aser iba ajanga nüburtem molungiang nung tasüngdangba ka arur.

Küm asem agi jelia Brehostibarnü election agiba nung Conservative nungi parliament nung menden timba agiteta aliba nungi tesama aluba sülen May lenisüba anogotem tembanga arur, ta lenir aikati züngshir.



Bologna, June 11 : Bologna, Italy nung June 11-nü 'G7 group of industrialised nation' tem nungi Environment ministertem senden ka amenba mapang Canada Environment Minister, Catherine McKenna-i o jembiba mapang tangokba noksa nung angur.

MP atema France nung election agir

Paris, June 11 (Agencies): France nung taoba ita Emmanuel Macron tir shimba sülen Parliament nung inyaksü atema Member of Parliament (MP) shimba maparen tanü tenzükogo.

France indang parliament nung menden 577 lir aser La Republique en Marche (LREM) telok nungi Macron lenir sür menden timba angutsü teimla nung lir.

France nung MP election ya anaben agitsü aser taruba Deobarnü tanabuba round agitsü lir.

Deobarnü vote agütsüba ya GMT 06:00 ako nung tenzük aser GMT 18:00 ako nung shibang, iba sülen mapang talangka melie tanü agiba osang sangdongtsü.

Vote shilem 50 dak tali angurtem asoshi tanü agiba election ya tatem asütsü aser shilem tajemba agi 12.5 angurtem tanabuba round nung tokteptsü akoktsü aser takoker-i menden agitsü.

Macron'er party ya küm ka tejaklen tenzük aser taküm MP election nung tokteptsü asoshi candidate ya kaketshir, sorkar mapa nungi anena alir aser

bullfighter densema inoka lir.

French overseas constituencies nung seat 11 atema election agiba nung LREM teloki menden 10 bo kokogo aser iba teloki France linük telongzük nunga kasa takok angutsü, ta 'opinion poll' nung sayur.

US tir, Donald Trump den kasa sapang nung tzü mopung melenshiba ken o jembiba ajanga France tir tasenba, Emmanuel Macron ya nüburtemi kanga sabua kümogo. Saka arishi küm 39 tain, Macron-i France nung temelenshi arudaktsütsü nangzüka aliba ama inyaktettsü asoshi par teloki parliament nung menden timba angutsüla.

France nung kasa menden asoshi dokteper tongtibang telok ya Marine Le Pen indang National Front aser Jean-Luc Melenchon indang France Unbowed amala lir.

Iba election nung lendong madoki tesünep nung agitettsü mechi mitkartem tali saksalema kümogo aser Deobarnü teroto tashi nung vote agütsür shilem 19.24 liasü.



Mosul, June 11: Western Mosul nung aliba al-Zanjili district nung Iraq mitkartem aser Islamic States telungpurtem tsüngta raraba mapang raksaba garitem noksa nung angur.

IIT-JEE (Advanced) nung Chandigarh nungi Sarvesh Mehtani temaba jenjang ngutet



Anand Super-30 tenzüksang Anand Kumar den IIT JEE Advanced exam nung takok anguba kaketshirtem külemi agiba noksa ka angur. Taküm tatidang nunga iba reju nungi kaketshir 30 pronglai IIT-JEE Advanced examination nung takok nguogo. (Patna, June 11)

New Delhi, June 11 (Agencies): IIT-JEE (Advanced) engineering tatidang agiba osang Deobarnü sangdongba nung Chandigarh nungi Sarvesh Mehtani-i temaba jenjang ngutet.

Pune nungi Akshat Chugh tanabuba aser Delhi nungi Ananye Agarwal tasembuba jenjang nung iba Indian Institute

of Technology tatidang indang takok ngutet. Mehtani ya IIT Roorkee zone, Chugh ya IIT Bombay zone aser Agarwal ya IIT Delhi zone nungi lir.

Kaketshirtem jenjang 100 nung alirtem rongnungi parnok kaketshir 29 IIT Madras zone nungi, 26 Delhi zone nungi, 25 IIT Bombay zone nungi aser IIT

Kanpur zone nungi trok lir.

Taküm JEE (Advanced) tatidang asoshi kaketshir lakh 1.74 tenüing agütsü. Taküm mezüingbuba iba IIT tatidang ya tanga linük trok nunga agi, aser iba ajanga parnok rongnungi candidate 500 tanga linük nungi liasü. Taküm IIT tatidang nung takok angur ajunga tenüing mapang talangka melii sangdongtsü.

IIT nung takok angur kaketshitem nem seat ya June 19 nung lemsatsütsü imlar. Taküm IIT tatidang nung temaba jenjang angurtem kaketshir 11,000 tera majung lir aser parnok ya IIT 23 nung züingdaksütsü asoshi seat lemsatsütsü.

IIT Madras nung iba tatidang ya May 21 nung agi, aser 'ambiguous' tasüingdangba asem langzüteter kaketshirtem nem marks 11 tali agütsü. Item tasüingtangba rongnung ana mathematics section aser tasembuba ya physics section nungi liasü.

Goa nung June 14 nungi 17 tashi 'Hindu Adhiveshan' alitsü

Mangaluru, June 11 (Agencies): Hindu Janajagruti Samiti-i Goa nung 6 buba Akhil Bharatiya Hindu Adhiveshan ayongzük amungtsü, ta state co-ordinator Guruprasad-i ashi.

Iba sentong ya June 14 nungi 17 tashi alitsü aser linük 20 dak tema nungi Hinduism sülen anidakertem adenshitsu. Sentong nung Hindu nung teimba sür aliba linük nung 'Hindu Rashtira' tentettsü indang tebilembatem lemsateptsü, ta Guruprasad-isa metetdaksü.

Hindu nung dak sendakba

onüktem benoka olemtepba dang külemi Linük Temzüing arlla Article 370 agientsü atema takhangba agütsütsü. Iba arlla agienba ajanga Jammu & Kashmir nung Hindu nungertem yaritettsü, ta paisa shisem.

Jammu & Kashmir nung sepaitem dak lung agi ona lungkak aiterem azüoktsü atema Army nem tashi agüjang ta Hindu Janajagruti Samiti-i takhangba agüja, Mangaluru, Udupi, Bengaluru, Hubli, Shivmogga aser Vijayapura tesemtem nung lungkak aitba

sentongtem ayongzüka agiogo.

Guruprasad-isa ashiba agi, sepaitem dak lung agi aoner anema sorkari mapa inyaksüla aser ozüing tesashi agi merenshitsu.

Nashi tepsetbaji Hindu nung anema inyakba mapa ka lir anungji iba inyakyim nokdangtsüla, ta paisa shisem.

Goa nung ayongzüka amungba sentong nung India aser bendanglen nungi teshimtet nübo 400 den tema arua adentsü, ta Hindu Janajagruti Samiti sangdong nungsa metetdaksü.

Nashi nokdangba onük nung Tripura CM-i Kerala CM pusemer

Thiruvananthapuram (Kerala), June 11 (Agencies): Centre sorkari shiruru market nung nashi ayokba mesüra aliba tenokdangba metetdaksüba onük nung Tripura Chief Minister, Manik Sarkar-i Kerala Chief Minister, Pinarayi Vijayan pusema shidi ka zülu.

Kerala Chief Minister Pinarayi Vijayan-i shidi ajanga tanga state tem dang, Centre

tetuyuba anema nokdangdaksüner, kechiyong iba tetuyuba yagi federal inyakyim alema inyaker, ta lemsatepa liasü.

Iba shidiji langzüa Tripura Chief Minister, Sarkar-i Centre tetuyuba anemer chief minister tem senden nung pa adentsü ta metetdaksüogo, ta tanü Kerala CM's office ajanga metetdaksü.

State aikati Centre sorkar

tetuyuba anema nokdaker aser iba onük atema tebilemstsü akar, ta Tripura Chief Minister-i shiogo.


Sarkar-isa, Centre sorkari democray lima nung mepetba inyakba aser federal inyakyim anemba anema senden ka nüngdaker. Telemtetba ka agitsü atema chief minister tem senden ayongzüksü atema inyakbaji junga shisatetogo," ta metetdaksü.



June 10, 2017 nü Fontana, United States nung Guinness World Records ketdangser tetsür kati Guinness World Records title anguba pizza talangtiba reprangba noksa nung angur. Iba pizza ya kilometer 2.13 (Mile 1.32) talang lir. 2016 küm Italy kübok Naples nung Napoli Pizza Village-i iba record bena liasü, aser iba pizza ji kilometer 1.85 liasü.

COMMEMORATION OF FIRST DEATH OF OUR MOST BELOVED ACHANGPONG LONGKUMER (DIBUIA)

DIED ON - 12-06-2016



DEAR ACHANG,
THERE IS AN ACHE WITHIN OUR HEARTS THAT WILL NEVER GO AWAY.

LOVING,
DAD, MUM & SISTERS

Office of the LONGSA WADIR ZÜNGA District Mokokchung PELABA SANGDONGER

WB. Imliyanger Jamir (S/o Lt. Imtimeren Jamir) Ao senden nung Tir shimtetba asoshi Longsa Wadir zünger-i pelaba sangdonger.

Aor lokti tejaklen anitsü asoshi tematiba Tsüngrem-i asen lenir aser par kibong nem shisatsü aser anema aliba moajang ta zünger sarasadem.

Sd/-
Convenor
Longsa Wadir Zünga

GARI KAKET SAMA ASÜ ?

Dimapur nung Maruti Alto indang gari kaket ka den ATM card ana shia arua lir. Kiburi mobile Number 9856789220 den tongtepratepangma.

9 AR-i ganja seret 880 apu



Dimapur, June 11 (TYO): jena ao, ta AR sangdong ka Osang tejangka ka angazükba nung metetdaksü. nung ajemdaker June 10 nü Mahindra Bolero Pickup (Registration No NL 01K HQ IGAR (North) kübok 9 Assam Rifles-i Tesisema 0740) gari nungjagi ganja seret 880 ngutetetogo, aser ganja amenoker mita reprangdang den gariji Police Station Kohima nungi Wokha tsütsüleni Chiephobozou ket nung aoba gari anir kati sepaitem agütsü, ta sangdong nungsa anuguba sülen gariji toktsür shia lir.

GST: Movie tickets, insulin,... (Tapak 1 nungi...)

3) Packaged food: Chutney, akümtsü, kechiyong tanü GST murabba, pickle, ketchup, toppings, Council-i tractor osettem nung instant food mixes amalatem nung saru 28% nungi 18 ajemtsü. 18% agitsü ta asüba nungi 12% ajema kümtsüogo.

4) School Items: Tsüraburtem atema school bill ajema akümtsü akok, kechiyong GST Council-i school yangkhu nung saru 28% agitsü ta asüba nungi 18% kümtsüogo, exercise books nung 18% aliba nungi 12% aser coloring books 12% aliba nungi tazüingla kümtsü.

5) Printers: Computer printers nung mezüingbo saru 28% agitsü ta latet saka tanü ibaji 18% kümtsüogo.

6) Cutlery: Cutlery (knives, forks & spoons) nung saru 18% aliba nungi 12 ajemtsü.

7) Tractor components: Tsünusenbongba maparen nung tractor indang jenjang ajema

8) Plastic items: Plastic industry-i GST saru tajemba agitsü atema asüingdanga aru aser tanü council-i plastic beads nung saru 28% agitsü ta asüba nungi 18% aser plastic tarpaulin nunga 28% nungi 18% ajemtsüogo.

9) Agarbatti: Agarbatti (incense sticks) industry-i saru ajemtsü atema asüingdanga liasü aser parnoka saru 12% nungi 5% kümtsüogo.

10) Cashewnuts: Cashewnuts indang jenjang dalangba akümtsü akok kechiyong council-i cashewnuts nung saru 12% aliba nungi 5% kümtsü.

GST Council ya June 18, 2017 nü ano senden amentsü aser iba mapang lottery tickets, e-way bills indang jenjang latettsü.

Nadal-i otsü tasen yanglua French Open 10-ben akok



Paris, June 11 (Agencies): 2017 French Open tebur tennis kija asaya Deobarnü asayaba nung Rafael Nadal-i otsü tasen yangluteta akok. Deobarnü iba asayamong koktetba ajanga Nadal-i French Open 10-ben akokba otsü yangluogo aser Grand Slam takok marok 15buba ngutetogo.

Spain nunger arishi küm 31 tain, Nadal aser Stan Wawrinka tsüingta 2017 French Open tebur kija asaya nung Nadal-i 6-2, 6-3, 6-1 agi Wawrinka madak takok angu aser iba takok marok 10-ben tashi angur rongnung pa mezüingbuba kümogo.

Grand Slam takok angur rongnung Roger Federer temaba jenjang nung lir aser Nadal-i asem agi memenepe lir.

Nadal-i Grand Slam final 22-ben asayaba nung asembe buba set kata tangar nem mokokdaksüi Paris takok

marok ngutet. 2017 French Open nung Nadal-i game 35 dang makok aser tanü final asayaba nung game trok dang makok. 2008 küm kasa tournament final Nadal aser Roger Federer tsüingda asayaba nung Federer-i game pezü dang agiteta liasü. "La Decima akokba ya kanga sa balaka lir. Ni tang bilemba ya tebang agi rasa-a ashitsü makoktsü," ta Nadal-i iba takok marok agizüker jembidang ashi.

Hollywood A-listner, Nicole Kidman-i iba Coupe des Mousquetaires marok ya final asayatsü reprangi arua alir dang lapoka sayu.

Tanü asaya ya Nadal asoshi Grand Slam final 22 buba asayar asü aser Wawrinka asoshi pezü buba asü. Iba tournament nung arishi küm 44 tain, Wawrinka ya tambutisang liasü.

India-i South Africa koka semifinal tongtetogo



2017 ICC Champions Trophy Group B Oval nung June 11 nü asayadang India nunger asayar Shikhar Dhawan (tachichi) aser Virat Kohli na run agia asem dang tangokba noksa nung

London, June 11 (Agencies): Kennington Oval, London nung Deobarnü Defending champions India-i ICC Champions Trophy nung South Africa madak wicket 8 agi koka semifinal tongtetogo. Iba asaya ya India nunger atema kichisüdir süaka akoktsüba asaya ka liasü.

ODI nung mezüingbuba jenjang nung aliba team ya run 191 dang yanglur ajak out südaktsüba sülen India nunger-i asaya atemtsü asoshi over 12 anunga lia iba asaya akok. Asaya nung Shikhar Dhawan-i run timtiba yanglu.

Pai ball 83 nung run 78 yanglu aser iba sülen Virat Kohli-i out mesüi run 76 yanglu. Bhuvneshwar Kumar aser Jasprit Bumrah nati wicket anana agi. Iba takok ajanga India nungeri Champions Trophy semifinal pongubenbuba tongtetogo.

Asaya nung South Africa pur mezüingbatting amen. Opener Quinton de Kock (53) aser Hashim Amla (35) nati kanga junga asayaa tenzük. Over 18 buba nung Ashwin-i Amla out sütsü aser iba sülen Faf du Plessis ait. De Kock tena senteper SA pur run 100

England-i FIFA U-20 World Cup kokogo

Suwon, June 11 (Agencies): Under-20 World Cup final Suwon World Cup Stadium nung Deobarnü asaya nung Dominic Calvert-Lewin-i asaya mezüingbuba shilem nung England pur atema goal ka agüja Venezuela kokogo. Iba takok ya parnok asoshi 1996 küm nungi tang tashi nung mezüingbuba global title akokba asütsü.

Iba asaya nung Everton striker-i goal ka agütsüba ajanga tebandangji adok ajisüaka goalkeeper Freddie Woodman-ia asaya tanabuba shilem nung Adalberto Penaranda-i metsüba goal ka save süa liasü.

Asaya nung England puri mezüingbuba goal idaktsütsü asoshi maongka angu. Dominic Solanke-i defense nung aibelenba maongka agia penalty area-i ball bener ai saka goal aser tena tsüingda goalkeeper kija dang anunga lia Liverpool striker yagi ball nung kanga junga memetsüshii Wuilker Farinez tsüing nung ball metsüloksü.

Iba sülen minute 10 lir Ademola Lookman-i Farinez-i metsüba goal ka kanga junga nokdanga liasü.

Mapang tatsüka tsüingda nung Venezuela pur atema maongka tajunga ngua Ronaldo Lucena-i meter 30 shi nungi free kick ka metsü saka tia maka ball post nung ondaka



England nunger asayartem final akokba sülen takok marok amer pelatepba noksa nung angur.

goal magütsütet.

Asaya mezüingbuba shilem atemtsü minute 10 lia Calvert-Lewin-i goal ka agütsü koba ajanga parnoki iba asaya akok.

Asaya tanabuba shilem tenzük minute 6 shi nung Venezuela puri goal agüja score kasa kümter lila saka Sergio Cordova-i goalkeeper mepaitokteti Woodman-i ball nokdangadok.

Asaya atemtsü minute 17 lia Jake Clarke-Salter-i Penaranda

penalty box telung nung alangdaktsüba atem referee Bjorn Kuipers-i penalty ka agütsü. Ajisüaka Penaranda metsüba ball Woodman-i kanga junga nokdang.

Venezuela-i semifinal Uruguay den asayadang asaya tatemtsü lia goal agüja kasa aküm aser iba asaya parnoki akok saka final asaya nung parnoki taoba asaya ama masayateti England nem iba asayamong kokdaksü.

India nunger asayartem Indonesia Super Series nung shilem agitsü

Jakarta, June 11 (Agencies): Taküm B Sai Praneeth atema takok küm ka lir aser maneni Indonesia Super Series Premier koba Hombar nü nungi qualifier tenzüktsü ali, iba asayamong nunga tanga mapang nung junga asayaba ama asayaa takok angutsü asoshi imlar.

Arishi küm 24 tain India nunger badminton asayar yagi April ita Singapore Super Series akok aser iba sülen taoba hopta Thailand Grand Prix Gold kokogo. Pai maneni Indonesia open nung Korea nunger Son Wan Ho den mezüingbuba asaya nung junga asayaa tenzüktsü imlar.

Olympic silver medalist P V Sindhu-ia iba asayamong nung shilem tajung agitsü imlaa atar. Ajisüaka Saina Nehwal atema iba asayamong kanga ayong ayongabo metenzüktsü kechiyong la Thailand tsür Ratchanok Intanon den mezüingbuba asaya nung asayatsü.

Taküm küm asayaa aruba

nung Sindhu-i Syed Modi Grand Prix Gold aser India Super Series kokogo. La maneni Singapore aser Asian Championship nung quarterfinal tongteta asayaaogo.

Arishi küm 21 tain asayar yagi la indang career nung jenjang tajungtiba; world no.2 taküm ajangteta liasü. La taruba asayamong mezüing asaya nung Thailand tsür Pornpawee Chochuwong den asayatsü.

Kasa mapang nung Saina shiba yiruba ajanga junga masayateti arudar, la küm 7 tsüingda nung mezüingbuba taoba hopta world top 10 nungi toguogo. La iba asayamong nung takok ngunera kanga junga asayatsü nungdaker.

India nunger teburtem kija asayartem rongnung ano Ajay Jayaram Indonesia nunger Jonatan Christie den asayatsü aser Kidambi Srikanth Hong Kong nunger Wong Wing Ki Vincent den asayatsü. Maneni Sameer Verma Dane Jan O Jorgensen den asayatsü.

1984 Olympics nung Michael -i asema tsüingsem sen \$190,000 agi ayok

New York, June 11 (Agencies): Michael Jordan-i 1984 Los Angeles Olympic indang basketball final nung asema tsüingsem online auction nung sen \$190,372 agi Deobarnü ayok, ta osang ka iba auction ketdangser-i metetdaksü.

Temesüng aser anüing sentsü aketba Converse indang tsüingsem ya Jordan-i semer 1984, August 10-nü Spain den final asayaba mapang points 20 nguteta par telok-i 96-65 agi Spain madak takok ngua liasü.

Spain madak takok anguba sülen Jordan-i iba tsüingsem nung pa tenüng zülur

(autograph) arishi küm 11 tain tebur ka nem agütsü, ta iba auction sentong ayonger telok, SCPAuction house ajanga ashi.

Jordan-i Nike masüba tsüingsem asema rongnung iba tsüingsem ya tatembang buba liasü, ta SCP-i ashi. Iba sülen Jordan-i Adidas tsüingsem sümnüa liasü saka 1984 Olympics akokba sülen Nike den pai sen \$500,000 jenjang

'deal' yanglu aser pa indang brand ajanga Nike-i küm shia sen billion \$2.5 yokzükter, ta ESPN ajanga ashir.

Deobarnü iba tsüingsem alir tenüng ya mesangdong. Iba auction ya May 24 nung tenzük liasü. Jordan-i 1997 National Basketball League final nung asema tsüingsem 2013 küm sen \$104,765 agi ayok.

BILEMDANGANG

"Nü dak shibai temolung malemer, pa dak nai temolung malemstsüla"